

莫如光訪談第一稿

訪談背景資料：

被訪者： 莫如光_____

訪問者： 張慧真_____

訪問參加者： 任韻竹_____

訪談日期： 2014 年 12 月 18 日

訪談時間： 14 小時 30 分 至 16 小時 35 分

訪談地點： 香港浸會大學 AAB812 室

錄音長度： 2 小時 05 分

(**即錄音檔案上顯示的時間總數，請以分鐘計算。)

稿件撰寫： 第一稿 甘盛麗 (2015 年 5 月 21 日)

莫如光（莫）、訪問者（女）

第一段錄音	
莫：	我講嘅等你參考……啊……
女：	係呀係呀，好啊好啊。
莫：	你認為你有冇……
女：	價值……
莫：	假如無關教養院的話呢你就唔須要晒時間精力
女：	好哦好哦，啱啱啱啱。咁你可能簡單講下徐生，嗰我到時再考慮下睇下徐生啱唔啱。如果我想瞭解空軍就要搵佢喇。
莫：	海軍。
女：	海軍？係啦。如果要瞭解海軍就要找他喇。
莫：	海軍……啊……去咗臺灣之後呢點樣啊，嗰啲嘢你就要問他，他就比較清楚啦。
女：	係係
莫：	因為我呢，我就從海軍畢咗業之後呢，我大姐直接接我回來廣東，就屬於叫做第四軍區，係……係廣東海防，海防．．． 嗰個時候呢就，我．．． 我就做喇，就初期呢我們因為，

	美國……美國海軍呢就話，講起來呢，我們學校呢就學英國，學英國技術嘅嘛
女：	係係
莫：	怎麼知道到了星島之後呢，就改咗要學美國技術嘅嘛
女：	哦，轉咗去美國
莫：	其實嘅方法係差唔多一樣嘅
女：	哦？！嘅方法係差唔多一樣嘅！
莫：	哦，唔過就，即好似呃……點講呢，好似三角，你梗識嘅喇。
女：	係係，三角
莫：	英國人呢，就要用兩角夾邊去……
女：	哦？三角。兩角夾邊……
莫：	去求個……個船嘅位置嘅
女：	係
莫：	但係美國呢，就用兩邊夾角
女：	喔，唔同嘅
莫：	方法呢……道理係一樣喇，你係兩個角一個邊，我係兩個邊一個角嗰，唔過係計數就唔同樣嘅。咁我哋因為從英國學了之後回來學美國的東西，一睇個道理，兩角夾變和兩邊夾角係一樣的做法，唔過嘅 Formula 又唔同喇。因為讀書呢個時候成績好好，就學……（雙方寒暄）【02:18 - 02:27】
女：	不如咁啦，莫先生，我由頭開始問你啦
莫：	好呀
女：	嗰我可以掌握得隨便一些，莫先生你什麼年份出生的？
莫：	1928
女：	1928？
莫：	1928 年 6 月 6 日
女：	哦……你喺一邊個，邊一個地方出世的？
莫：	喺新會
女：	新會？
莫：	應該係喺新會，細個嘅事……

女：	係呀係呀。咁你嘅新會出世呢你嘅排第幾屋企？
莫：	我嘅屋企我排第十的。
女：	哇！你咁大一個家族？
莫：	係呀
女：	十兄弟姊妹？
莫：	但係生存，嗰個時期生存的(孩子)已經係得番七個
女：	七個？你排第幾咁樣？
莫：	我排最尾
女：	你排第十？即係話你係么仔來嘅？
莫：	係呀
女：	哦。你排第十。咁你新會家裏做什麼工作的？
莫：	嗰陣時好細個嗟。咁我爸爸以前係牧師來的
女：	哦
莫：	但係他早就唔嘅度了。我大概六七歲的時候他已經唔嘅度了
女：	嗯嗯。
莫：	嗰我哋就跟媽媽。由於爸爸唔嘅度呢，咁媽媽唔可以照顧咁多嘛。於是大的嗰啲……最大的姐姐跟我相差十幾年，嗰他們就各散東西了
女：	係
莫：	有啲教書跟學校啊，有啲讀書就跟學校搬，打仗咯嘛，散曬了
女：	喔
莫：	咁我就一個人跟住媽媽
女：	係係
莫：	咁呃，有一個哥哥跟著媽媽，但係哥後來跟了遊擊隊嗰啲去咗，就唔嘅家裡了。就得我一個跟阿媽
女：	哦。嗰個哥哥跟咗遊擊隊？
莫：	係
女：	咁就得番你跟媽媽？
莫：	係。我一個人跟媽媽。嗰媽媽呢，因為生……後來人地話俾我聽呢可能她生育太多，所以她身體就唔好喇。咁我嗰陣時呢細個啦，唔識得。咁媽媽嘅度……嘅禮拜堂，咁我又嘅禮

	拜堂，咁又有學校返，咁又有同學，咁咪也都唔識咯啦
女：	乜都唔知的哦？
莫：	咁後來……咁最初嗰陣時爸爸唔喺度呢，有個大佬……有個阿哥呢喺廣州嘅
女：	嗯，喔……
莫：	帶咗我去廣州啦。咁但係你要知道我喺鄉下出去嗰啲，乜都唔識咯嘛，你讀書都差過人咯啦，咁我考唔到學校
女：	幾多歲去廣州嘅嗰時候？
莫：	廣州嗰陣時大概……我喺廣州嘅時候大概七八歲
女：	七八歲？即係話七八歲之前都喺新會的？
莫：	喺新會的
女：	哦哦。咁七八歲去廣州之前，喺新會有冇讀過書啊？
莫：	讀過小學嘅，讀幼稚園嘅……幼稚園嘅。我六歲……六歲已經喺幼稚園，小學一年級了。
女：	咁你都……即係你都幾順序咁樣讀幼稚園，再讀小學，即係新會嘅時候？
莫：	係呀。我六歲已經一年級
女：	係嘅係嘅，咁係唔係因為你爸爸媽媽都識字啊？
莫：	係呀
女：	所以都送你去讀書？
莫：	係呀
女：	嗯嗯
莫：	咁喺……由於去跟哥哥嗰陣時呢，嗰陣時冇乜，經濟唔係咁好，很興……依家唔知學校點呢，即係你喺度教，你啲兄弟姐妹啊、直係親屬可以免費入學咯嘛
女：	係呀
莫：	咁嗰陣時又……咁爸爸唔喺度了，沒錢了，咁我咪去跟他嘅。
女：	喔……
莫：	去跟他，點知道他就很嚴嘅
女：	很嚴？
莫：	他喺……喺學校教英文、數學嘅
女：	哇，他咁叻嘅？教英文、數學？

莫：	係啊，但係他即係很嚴咯
女：	係係。好嚴厲嘅佢？
莫：	打手板啊、打……敲頭殼啊嗰啲，所以後來我見到很多親戚、同學，他們都“哇！嗰個係你阿哥啊？！”我要清算他呀咁，因為他唔理你咁多，你唔識他就罰啊咁
女：	哦哦。對你要求很高喔？
莫：	他要求很高嘅
女：	係嘢
莫：	所以我嗰陣時……我後期啲中、英、數好呢，都係他……
女：	打基礎？
莫：	打出來嘅
女：	冇錯冇錯
莫：	佢直情係打出來嘅，敲頭殼啦。因個我返學，返嚟……個個細路仔返嚟……返學返嚟都唔使做功課咯嘛，依家就要做功課嗟。他唔行㗎嘛，他又要我做功課，做功課咁，仲要我學第二本書，咁他教咯嘛。
女：	咁犀利咯？
莫：	啊
女：	哦……原來係咁。
莫：	咁墊了個底(按：即打好基礎)，就……好點嘢。所以我後來考乜嘢都可以考到，即係全靠咁樣嘢。
女：	係，冇錯。你記唔記得嗰間小學叫乜名？
莫：	喺新會，有間叫做……最初嗰間就 <u>德新</u> 嘢
女：	“德”啊，道德的“德”，新年的“新”？
莫：	係
女：	哦。德新小學
莫：	係。依家我諗唔知有了。
女：	係。最初的嗰間？係唔係即係你哥哥的嗰間？
莫：	他教嗰間？唔係。他教嗰間……係培正。
女：	哦。他教培正？
莫：	培正，廣州培正。

女：	哦，廣州培正。即係你去廣州時跟他，就喺廣州培正？
莫：	我又考唔到培正咯嘛
女：	哦哦
莫：	就考咗間唔知乜嘢學校，我都沒心機啊，叫乜名唔記得了。
女：	哦哦
莫：	但係他要……喺家裡要……
女：	要再教你？
莫：	係呀，要求很高咯。我啲家姐話去探阿叔，喺……喺廣州郊……野郊外啲啲城鎮喇
女：	係係，好似喺東山係嗎？培正
莫：	培正喺東山。
女：	東山嗟嘛喔。
莫：	郊外就……即係啲啲村，他們去都唔俾我去咯，要喺度做功課。呵呵呵！
女：	對你要求很……好彩你讀好書喔
莫：	係呀
女：	哦，嗯嗯。咁你哥哥就喺培正教，即係你呢最初就喺新會讀了小學，德新小學？
莫：	係呀
女：	咁然後呢？七歲呀，六七歲呢？就出去廣州跟你哥哥了？係唔係啊？
莫：	係呀
女：	咁你哥哥當時就喺培正度教書
莫：	嗯
女：	哦。
莫：	咁他……他後來……
女：	咁你住喺邊啊那陣時喺廣州？
莫：	咪住……喺廣州，住喺他個度。
女：	嗰他係唔係住喺東山個度？
莫：	他喺東山
女：	所以就喺東山個度住
莫：	他成個家喺個度……喺東山嘛，他又……又結婚咯嘛

女：	嗯嗯……哦。你哥哥就教數學同埋英文？
莫：	係啊。咁他……他……抗戰了，咁咪七七盧溝橋，沒多久就炸廣州嘛
女：	係係係
莫：	咁咪學校就要搬嘍，咁他就送我們回新會了
女：	送你們回新會啊？
莫：	回去跟啊媽
女：	即係你嗰時你媽媽就自己嚟新會，你一個人嚟廣州，跟你哥哥的？
莫：	係呀。咁他又要跟學校搬去……後來又澳門又乜嘢咯嘍
女：	他跟培正走？
莫：	係呀
女：	喔，係呀。
莫：	咁他唔能夠帶我咯嘛
女：	㗎㗎
莫：	咁就送返我返新會跟阿媽嘍
女：	咁你哥哥都嚟唔嚟度啊仲？
莫：	唔嚟度了
女：	唔嚟度了？因為他們……
莫：	個個都唔嚟度了
女：	差很遠的哦
莫：	依家剩下我一個了，我一個……
女：	哦……哦。因為你係最小的。
莫：	我係最小的
女：	嗰問多你一句先……頭先你提到你呢話你爸爸係牧師呢，他也嘢教會啊？
莫：	浸信會。
女：	哦，浸信會啊？係我們呢個會喔。你爸爸係浸信會。嗯哼嗯哼，好難得喔，嗰個時候，唔係咁多人做牧師咯嘛。
莫：	唔知嘍
女：	因為太小就……你爸爸就唔嚟度了

莫：	不過我知道他係牧師，因為我嘅教會……教堂大咯嘛
女：	係
莫：	所以我依家唔係咁……成日去教堂呢，就因為……他們有人同我解釋，因為你嘅教堂長大的，你就會厭咯啦
女：	係唔係啊，哦……
莫：	對教堂呢……好似有種……唔係咁喜歡成日去教堂
女：	係係。但係你都受洗咗係嗎？細細個那陣時你爸爸就……
莫：	受洗咯啦
女：	受洗咯啦
莫：	我記得他仲在生的時候，就同我哋受洗。
女：	喔……
莫：	我都係受洗咯啦
女：	係係系，哦。
莫：	所以……
女：	咁你媽媽都係教徒來的？
莫：	她係傳道的嘅
女：	哦，你媽媽係傳道的？女傳道？
莫：	女傳道
女：	哦哦……噢，好特別哦，你屋企個個背景。
莫：	係嘅
女：	很少的喔個時候……
莫：	所以……所以依家有好多朋友話我：“你都唔係教徒來的”，我話“我係教徒，但係我……”
女：	很早添……
莫：	但係我就……我我……依家啲教會又唔同舊時啲教會
女：	係係係，啱啱啱
莫：	嗰時教會呢就好興有啲乜嘢叫做“長老”啊，嗰啲嘅教會成日出入咯嘛
女：	嗯嗯，宜家都有㗎。
莫：	咁你知啦，我嗰陣時……成日纏著……我要去讀書啊，有時又返學啊，有時去……

女：	嗯嗯
莫：	咁去教堂嘅時候，我梗係遲到咯嘛，遲到肯定係縮一縮，後面就好啦
女：	嗯嗯
莫：	但係嗰啲……
女：	長老
莫：	嗰啲長老啊又同你打招呼啊，又想你去前面，咁咪後生仔嗰陣時，哎呀，我都唔想被人知我……
女：	係呀係呀
莫：	做衰咗，仲要我咁樣。所以整啊整呢，我漸漸就對……
女：	係
莫：	對他們這班人抗拒
女：	係
莫：	正所謂聖經講，法利賽人。
女：	係係，哦……
莫：	咁咪咁嘅，所以我就……
女：	係，我明白你的意思
莫：	咁我反而喺加拿大呢，我都成日去教堂，因為嗰啲外國人有嘢咯
女：	係，係呀
莫：	行完禮之後就有個 tea-party 㗎嘛
女：	係呀，係呀
莫：	大家……
女：	交往
莫：	嗰陣時先……交往，係呀，但係你遲到早到呢，都有乜人傾計咯
女：	好自由咯？
莫：	好自由咯
女：	好自由，㗎嘅，你坐邊度唔理你啊咁樣
莫：	冇。所以咁樣養成我後來就不去了。反而喺加拿大就……
女：	哦。咁莫先生，介意唔介意講下你爸爸叫乜嘢名啊？

莫：	莫……莫文炯
女：	文章的“文”？
莫：	文章的文。“炯”就火字邊一個好似岡字咁一個……
女：	我知，炯炯有神個個“炯”？
莫：	係，炯炯有神個個“炯”。
女：	哦，好哦，都好特別喔。我諗你爸爸個個……經歷都好……都好傳奇
莫：	係呀。他係牧師，他……
女：	他應該係清朝個時候，民初嘅……清朝到民初……
莫：	民初嘅
女：	都係新會咯嘛？
莫：	係，新會
女：	你新會邊度啊？
莫：	我係新會城……其實呢……
女：	新會城？
莫：	新會城入邊
女：	哦，即係新會城裡邊有一間浸信會了個時已經？
莫：	有一間嘅了
女：	係唔係教堂啊？
莫：	係呀，教堂嘅
女：	係嘅，係嘅。咁你爸爸就喺個度做牧師嘛
莫：	係呀
女：	咁你成日返個間教堂，你有冇返去睇下仲有冇喺度？
莫：	唔喺度了
女：	唔喺度啦？
莫：	我返去睇過了。
女：	睇過了，冇啦？
莫：	冇了，可能拆咗
女：	哦，拆咗，係呀
莫：	發展咯嘛

女：	啱啱，哦，冇了，新會都很熱鬧咯
莫：	係。因為我……我上……早幾年返……返新會
女：	哦……
莫：	返新會就……因為有一個朋友識得嗰啲官嘢啊
女：	嗯嗯
莫：	咁他……咁他傾起上來，問我返返新會睇睇以前嗰間屋，我話……
女：	係嘢，係嘢
莫：	你知嗰啲官就好簡單咯嗟
女：	係呀
莫：	他咪送你去嘢
女：	係呀
莫：	但搵來搵去搵唔到
女：	搵唔到啊？
莫：	係，已經拆晒了。
女：	哦，即係你地址有嘅
莫：	有
女：	但係去到冇？
莫：	係呀。
女：	哦，拆咗
莫：	去到冇教堂，咁即係冇了
女：	哦，教堂都有了？
莫：	冇了
女：	哦，變咗很多？
莫：	變咗，改變咗
女：	咁哪，呃，你係培正啦，即係你去到培正嘅時候呢，大概即係 35 年咁上下啦，即係盧溝橋事變之前嘅？
莫：	之前嘅，3……3……睇下先
女：	係嘢。如果七歲就 3……28 年就,3……

莫：	七歲……
女：	係嘢，35 年咁嘢
莫：	七歲就……好似係 36……35 年，34、35 年嘢
女：	係嘢，34、35 年嘢。咁你就喺嗰度讀咗兩年小學啊？咁跟著，你唔記得個名了，嗰間就？
莫：	唔記得了
女：	係嘢。咁你住喺東山呢，係唔係到了盧溝橋事變就有咗轉變了開始？即係打……1937 年……
莫：	我們就返新會嘢
女：	返新會。哼哈，咁返咗新會之後就同跟媽媽一齊住啦？
莫：	係呀
女：	咁嗰時生活點啊，喺新會？
莫：	新會……都有乜特別。即係喺學校就唔係成日有堂上咯啦，因為警報啊
女：	喺邊間，咁你嗰陣時返新會讀邊間？
莫：	嗰間係……胥山
女：	胥山。哪個胥山？
莫：	伍子胥的“胥”，好似個“婿”字……女婿“婿”
女：	係胥山小學？
莫：	山就係山頭個山，胥山中學
女：	喔，中學？
莫：	它的附小嘛，他即係中小學一齊咯。
女：	哦哦
莫：	咁他嗰度……“伍”姓喺臺山好有錢咯嘛，咁咪起間祠堂，好西式咯，咁咪喺嗰度辦嘢
女：	係唔係依家都有了？嗰間學校？
莫：	我諗有咯，我諗會有咯。
女：	點解呢？點解就……
莫：	嗰間好好咯嘛起得，喺海邊，喺河邊。
女：	哦哦
莫：	咁他……我……我諗應該喺度。

女：	係呀係呀
莫：	我以前……大概點樣講呢……七八年前啊，就仲喺度。
女：	就仲係度，嗯嗯，哦哦
莫：	但係依家它……
女：	可能會唔會係歷史建築，嗰啲舊建築……
莫：	可能係，因為它起得好靚咯
女：	起得好靚
莫：	係，成……五層，五層，咁咪四個角，有個……有個涼亭咯嘛
女：	嗯，哦，即係都好講究喔？
莫：	好……好……好洋化咯
女：	哦
莫：	咁它中間先正一個……金字……頂
女：	係係，嗰點屋頂咯
莫：	咁你喺外邊呢……
女：	好靚喔
莫：	就望唔到它的
女：	喔……
莫：	只望到四個……四個塔
女：	係係
莫：	望唔到嗰個金頂嘢
女：	哦哦
莫：	咁你梗係喺飛機度睇到啦，但係喺下邊得望到塔
女：	望唔到，係係
莫：	睇唔到，幾靚咯
女：	哦哦……
女：	咁你就返去之後就喺胥山小學讀書？咁記唔記得讀幾多年班啊？
莫：	額……都唔記得了
女：	唔記得了

莫：	都……六年班啊
女：	哦……都幾小齡咯
莫：	或者初一都唔記得了嗰陣時
女：	係係
莫：	因為你鄉下嗰陣時呢就有……又有出世紙啦
女：	係
莫：	又有乜嘢啦
女：	係，有證明啊嗰啲乜嘢嘢
莫：	係，咁你話我讀幾年級啊，你讀得落你咪就讀嘢
女：	係呀，即個……
莫：	讀唔到咪返嘢
女：	嗯哼
莫：	我又喺嗰度成日就走，飛機來就走，乜嘢又走，學校呢……
女：	即係走警報嗰啲？
莫：	走警報，走日本仔啦
女：	係嘢係嘢
莫：	日本仔他……四鄉去……去搶啊……
女：	哦……
莫：	去……聽講係姦淫女人
女：	你有冇見？但係日本人嗰時到新會未啊？
莫：	喺廣州多。
女：	喺廣州多？
莫：	但他久了就出……四出搶劫啦
女：	嗯
莫：	即係有時都到新會嘢 1
女：	喔……你自己有冇見……撞過日本人？
莫：	我們走
女：	你們走？

莫：	你……一來呢，咁啲中國軍隊……武器又好差咯啦
女：	嗯嗯
莫：	咁他們一撤退了，咁咪叫我們一齊走㗎。
女：	哦，你們都走？
莫：	咁啲人就跟著他們走
女：	嗯嗯
莫：	走去邊呢，咁咪走去……好似依家咁啦，走去元朗啊，粉嶺啊啲啲總之遠啲個地方
女：	喱一喱先？
莫：	係
女：	避一避
莫：	咁他日本仔啊……喺……就係喺呢度搶劫……啊
女：	搶完就走咯啦？
莫：	係，搶劫，有時呢後生女人他就拉咗去啊咁
女：	係㗎係㗎
莫：	咁啲細路仔他們中意啊他就殺你啊
女：	喔……
莫：	“吉”（按：廣東方言，指刺）死都有咯
女：	嗯……
莫：	所以個個都走。但係他們搶一輪，三兩日呢他就撤退咯啦
女：	係
莫：	他又返番廣州。
女：	嗯嗯
莫：	咁咪大家又走返㗎
女：	走返來？喔……
莫：	啲生活就係咁咯。學校呢就，喺度……咁咪上堂，來一下就走
女：	就走了？
莫：	咁有時又搬咗去鄉下
女：	嗯哼……

莫：	鄉下有祠堂，喺祠堂又上堂，上三兩日又……
女：	哦。咁你嗰陣時都係同媽媽兩個人喔？
莫：	係呀。咁咪跟啲朋友啊，親戚啊，我諗她就啲……教會啲朋友。咁我唔知啊，細路。
女：	咁糧食夠唔夠啊，嗰時候？
莫：	夠，咁又夠。
女：	嗯，都夠？
莫：	都夠
女：	哦哦，都係夠飯食嘅？
莫：	夠，啲親戚朋友都有咯嘛
女：	嗯嗯
莫：	咁你鄉下嗰啲人，咁你……個個屋企都有糧食咯啦
女：	嗯嗯，即係都……你都……起碼嗰段時間冇點挨餓？
莫：	未點樣挨餓。
女：	係呀係呀
莫：	就唯一嘅缺憾呢，就係有書冇得讀
女：	係啦，係啦
莫：	就……啊……就
女：	即係唔完整㗎，要走來走去
莫：	生活又唔安定。
女：	係㗎係㗎
莫：	係，警報一響你就要走
女：	係係
莫：	咁咪有時啊……有時夠時間嘅，你咪走防空洞啊……
女：	啊，係㗎
莫：	防空壕啊咁㗎，但唔夠時間咁就走，忽然間警報響
女：	哈
莫：	咁聽到飛機聲就好驚咯啦
女：	喔……
莫：	因為他聽到飛機聲，好快就到咯嘛

女：	係唔係好吵嗰時？好……即係飛機一來就好吵呢啲？
莫：	它唔係好吵嗰啫
女：	咁你……
莫：	就好似你依家聽到飛機聲啦
女：	係係
莫：	它就咁樣，即係越來越大聲啊
女：	係嘢係嘢，即係由遠到近咁樣？
莫：	飛機很細架咯嘛
女：	係，嗯哼。係唔係即零式機個啲？
莫：	係咁上下嘢
女：	係嘢係嘢
莫：	它來到呢，扔兩個炸彈咁咯啦，起碼……劈裏啪啦扔兩個炸彈，咁咪炸到你，你咪冧嘢。
女：	嗯啊
莫：	咁我們走防空壕，個陣時喺學校掛著玩咯嘛，細路仔
女：	係啊
莫：	咁咪就走……走咗……走咗飛機到了，咁咪就走去啲……三四層個啲屋呢，喺下邊嘅嘢。
女：	嗯
莫：	其實都唔安全咯，因為假如炸中的話，它會冧咯嘛
女：	冧咗落來咯嘛
莫：	但係起碼都……他喺頭……喺頭落來了，咁都有嘢遮頭咁。
女：	係係
莫：	咁而且他……他……唔係話你……嗰屋他就炸你間屋嘛
女：	嗯
莫：	他扔咗兩個炸彈之後呢，他就返轉頭，就……掃咯啦，你好多人……走出去郊外咯嘛，他就喺個度掃射嘢
女：	喔……
莫：	死傷都……好多人咯
女：	嗯嗯，咁你個時自己驚唔驚咯？即係咁……個個……

莫：	梗係驚啦，咪走㗎
女：	十歲咁㗎，八、九……九、十歲咁樣
莫：	我媽喺……喺禮拜堂度，她又唔會走㗎
女：	哦，咁你自己走嗰㗎？過咗就返……搵返去？
莫：	跟住同學走。
女：	係㗎係㗎
莫：	所以她……炸……嗰陣時炸完之後，她咪……四……問啲隔離鄰舍啊，傷咗啲乜嘢人啊咁樣
女：	嗯
莫：	有冇細路仔咁樣
女：	哦
莫：	咁見到我們了……
女：	就搵返你們？
莫：	她就安落了
女：	係呀係呀
莫：	嗰陣時係咁樣嘅生活
女：	嗯
莫：	咁又未至於挨餓
女：	係，糧食反而都……都 OK 咯
莫：	都可以咯
女：	咁後來點樣呢你會由新會入來義養院呢？
莫：	咁咪……咁……嗰陣時生活就係咁樣啦
女：	嗯
莫：	又唔……又……
女：	唔穩定啦
莫：	唔穩定啦，書……讀書又係……有時有得讀，有時冇得讀。咁咪，有一……有一日啦……
女：	係

莫：	大概啲……就有啲……個個搶救隊啦
女：	搶救隊？
莫：	個陣時搶救隊係省政府派出來嘅。
女：	係啦
莫：	咁咪……省……搶救隊來到新會之後呢，就係新會宣傳了
女：	嗯嗯
莫：	即話……招……招呢啲細路仔……
女：	嗯嗯
莫：	呃，帶上去……安全後方
女：	係呀
莫：	咁咪……省政府供……供書教學，有衣有著咁
女：	哇，你記得好清楚喔，呵呵
莫：	哎，個陣時……最得意嘅時期嘛，最有希望嘅時間嘛。
女：	係呀，嗯嗯
莫：	咁就走返去話俾阿媽聽
女：	你係喺學校聽到，還係喺……祠堂或者邊度聽到呢啲宣傳咯？
莫：	學校，學校個啲同學啊，有人講嘛。
女：	啲同學，噢噢噢
莫：	咁咪話俾阿媽聽有個咁樣嘅機構。
女：	哦，係嘢
莫：	我阿媽個陣時呢，她又病了
女：	係
莫：	講“好啦，你有機會你自己走啦”。
女：	哦哦哦
莫：	咁咪執兩件衫嘢，個陣時冇乜衫，不同依家有嘢執啦，個陣時……
女：	哦，嗯嗯
莫：	就執兩件衫……
女：	個陣時就好簡單嗟喔

莫：	係呀，咁咪走去報名，走去報名啊……收咗
女：	即係所以係你自己去報嘅喔？
莫：	係啊
女：	就唔係你阿媽同你去報？
莫：	冇
女：	咁你嗰時候喺邊度報名？
莫：	呃，他喺一間祠堂嗰度
女：	喺一間祠堂？
莫：	搶救隊喺祠堂度有個機……即係辦公嘅呢……一個站咯嘛。
女：	係呀係呀
莫：	咁咪你去到，咁就報名……
女：	要……要有乜嘢手續咯？
莫：	冇啊，你唔係話你乜嘢名字，幾多歲。
女：	係
莫：	嗰陣時自己講嗟嘛。
女：	係呀，哦
莫：	我記得係咁上下嘅喔，我幾多歲，咁咪……住址都唔使問咯，因為你都要走嘅
女：	哦，係呀，即係即走嘅嘛？
莫：	你……你……報咗名他就收留你喺嗰度咯啦
女：	住喺祠堂嗰度？
莫：	係，好多小孩的
女：	哦，係啊，即係你報咗名之後同埋他們一齊嘅了？
莫：	係。咁他搶救隊好多人咯嘛
女：	係呀係呀
莫：	咁我們叫哥哥、姐姐咁啊嗰啲
女：	係呀係呀
女：	係……其實他嗰度係……呃，搶救隊呢，女嗰啲多啊，還是男女都有嘅？
莫：	男女都有嘅
女：	嗯哼，係唔係很後生嘅嗟？

莫：	係啊。咁我們叫哥哥、姐姐，咁唔會好大嘅，而且對我們很好咯
女：	係
莫：	就唔係……唔會……唔會喝你嘅
女：	態度好好喔
莫：	態度好好。所以我們啲細路覺得……好……唔驚㗎。
女：	係啊
莫：	係㗎，唔係好驚嘛，返來都。喺他們嗰度報咗名，咁咪係你喺呢度住啦
女：	喔……
莫：	俾他們訓地下嗟嘛
女：	係啊係啊係啊。即係裸曬行李，報完名就留嘅㗎？
莫：	冇行李嘅了（笑聲）
女：	裸兩件衫咁？
莫：	個個都係咁嘅嘛。他們鋪咗禾乾草……鋪曬地下
女：	哦哦
莫：	我們就訓
女：	咁他們俾埋你食嘅㗎？
莫：	係呀，即刻有食嘅，等於有食有住嘅
女：	係㗎係㗎，咁同埋他們對你好好
莫：	好好
女：	所以個感覺都……都好好嘅？
莫：	係啊
女：	嗯嗯
莫：	咁他唔係好多日嗟，好快脆就……
女：	係呀？
莫：	好快脆咯
女：	好快就走嘅了？
莫：	好快就一百幾十人了
女：	即係就……好快就召集……到百幾個細路仔嘅了？

莫：	係呀
女：	喔，咁有冇啲識嘅細路仔，即係你個團呢或者你個次召集呢，大概你依家諗一有諗幾多人同你一齊走？
莫：	我……我記……唔記得幾多人了，細路仔個陣時。高中都有成百幾人，成隊好似……
女：	咁有冇啲你識嘅？
莫：	冇啊，唔識嘅
女：	你全部唔識嘅？
莫：	我有好多同學都……爸爸媽媽唔俾咯嘛
女：	哦，係。咁所以你就自己一個人去嗰啲？
莫：	我自己一個人
女：	咁你都好……
莫：	咁我去咗……去咗之後……
女：	係嘅
莫：	唔夠一年我阿媽都唔啱度了
女：	喔喔喔
莫：	所以……又……
女：	所以又啱啱好
莫：	所以又去咗之後無見佢
女：	係啊，係嘅。咁你……你們留了幾內祠堂，跟著就出發了？
莫：	幾日嗰
女：	幾日嗰？
莫：	幾日嗰
女：	咁你們出發時候啲嘅路線點樣上去韶關曲江啊？
莫：	咁咪……唔記得很清楚了。總之就係行郊外
女：	行郊外？
莫：	喺田……田野咁樣、田基咁樣行，經過了一啲村又一啲村咁樣嘛
女：	係啊係啊。行上去啊？
莫：	行上去就
女：	由新會行到去曲江啊？

莫：	係呀。咁他政府呢就，可能同啲當地啲政府有聯絡嘅
女：	嗯
莫：	咁所以去到嗰度他們又可以煮飯俾我們食
女：	嗯
莫：	咁咪行到上肇慶嗰
女：	行到上肇慶？
莫：	我記得就係肇慶了
女：	係
莫：	四會都喺附近，有冇去我唔知了。
女：	係係
莫：	咁咪去到肇慶有河嘅，那條叫做北江嘛
女：	係嘅，北江
莫：	咁咪……有碼頭了，咪就上船
女：	喺碼頭……喺曲江嗰度上船？
莫：	喺韶關上船……唔係……喺肇慶，肇慶上船，肇慶上船咁咪直坐船去到曲江。
女：	哦，咁你們一百幾人都要分好幾只船喔？要唔要啊？
莫：	唔使！
女：	一隻船得嘅了？
莫：	呢細路仔個個訓地下嘅嘛
女：	哦哦
莫：	他啲係大帆船來嘅喔
女：	哦係大帆船來嘅？
莫：	唔係船仔來嘅。
女：	哦哦
莫：	大帆船
女：	係啊？
莫：	好大嘅，幾層咯嘛，喺嗰度訓嘅……
女：	哦哦。坐幾內船先到曲江啊，由肇慶？
莫：	唔記得了，要幾日……

女：	都要幾日嘅？
莫：	要幾日嘅
女：	哦哦，咁去到曲江嘅邊度上岸啊？
莫：	他咪係韶關嘅
女：	韶關？
莫：	韶關乜嘢埧個啲，唔知了。
女：	係係
莫：	總之喺河邊上船
女：	係
莫：	上船之後就集中
女：	係
莫：	因為他有啲……喺第度……啲地方來嘅嘛
女：	嗯嗯
莫：	咁咪集中咗之後呢……
女：	即係有幾隊搶救隊嘅？
莫：	係，好多
女：	咁咪大家集中曬？
莫：	集中喺韶關就分配咯嘛。
女：	哈哦哦
莫：	咁我就分咗去第五院
女：	第五院？係啊，係
莫：	嗰陣時已經第五間醫院嘅了，啱啱開始……
女：	嗯嗯
莫：	咁……咁嗰陣時初期大概……三、四千人一間啦
女：	哦……幾多喔啊？
莫：	係，嗰陣時已經成萬幾人咯了
女：	係嘢係嘢
女：	咁你由韶關停咗幾內啊？即係都分……等分配嗰段時期？
莫：	一兩日嗰

女：	哦，都好快嗟喔！
莫：	係，即刻又行路去……因為沒車送嘅，行去……
女：	咁你……你……他用乜嘢準則分配去唔同嘅院啊？
莫：	啊？
女：	他用乜嘢準則去分配？即係……
莫：	唔知哦
女：	唔知嘅？
莫：	唔知嘅
女：	他們話俾你聽去第五院？
莫：	你……你去嗰度……你咪跟……咁我分配去嗰陣時就……第五院
女：	嗯嗯，咁邊個帶你上去啊，第五院？
莫：	唔知啦
女：	又係啲哥哥、姐姐？
莫：	哥哥姐姐嘛
女：	哦。第五院嗰陣時喺邊度呢？
莫：	喺仁化
女：	喺仁化？
莫：	粵北嘅了
女：	粵北？哦，係嘢。都有一段路嘅喔？
莫：	係呀，仁化江頭……江頭鄉
女：	哦哦，江水嘅“江”？
莫：	係，江頭，人頭嘅“頭”，江頭鄉。
女：	係
莫：	咁個條……都幾好咯
女：	係
莫：	仁化有個……風景區嘛，因為丹霞……
女：	哦，丹霞山啊？有冇去過啊？
莫：	係啊
女：	我唔知道嗰個仁化，唔記得咗

莫：	係啊
女：	哦，就係個度啊？
莫：	係呀。咁我未去過啊
女：	係係係。咦？咁你有再返去了哦，咁樣？
莫：	我們喺丹霞下邊咯嘛
女：	係，嗯哼啊
莫：	丹霞山就……
女：	好靚嘅個度
莫：	我聽講……嘻嘻
女：	但係你……你個時候細路仔你有去過丹霞山啊？
莫：	冇
女：	但係你知道？
莫：	點去嗟？
女：	哦……
莫：	唔近咯嘛
女：	哦，唔近嘅？哦哦
莫：	即係……我睇依家開車個零鐘頭都得了
女：	哎，依家高鐵又方便㗎
莫：	係呀，細路仔個陣時就覺得好遠嘅了
女：	啱啱，咁你由曲江……哇，都遠㗎，你由韶關行去仁化
莫：	係啊，細路仔個陣時有嘢啊，你話行咪跟著行㗎
女：	哦，咁個地方……夜晚就訓邊度啊又？他們安排？
莫：	瞓祠堂㗎。
女：	瞓祠堂？
莫：	或者有時好天啊，就瞓……瞓啲曬穀場㗎。
女：	係係
莫：	呢村梗有個大……好大曬谷地方咯嘛，鋪咗紅毛泥咁嘅
女：	係係

莫：	咁喺嗰度訓㗎
女：	哦哦
莫：	細路仔有……
女：	係
莫：	嗰陣時，完全冇感覺到㗎……
女：	但係你……
莫：	要訓地下……
女：	你……由屋企出發啦，又經過……又行路啦，又搭船去到韶關啦，韶關又行到仁化，成個過程，你都小嘅時候……
莫：	係㗎
女：	你自己覺得點嘅？
莫：	嗰陣時十……
女：	十歲多㗎㗎？
莫：	十……十一歲
女：	十一歲，係㗎。嗯，嗰時候你自己有冇覺得點啊？
莫：	冇，覺得好好……好得意
女：	㗎。即係都好……適應得很快㗎？
莫：	唔覺得辛苦
女：	係㗎係㗎，嗯嗯
莫：	咁因為你嗰陣時又要走，又要走警報啊，又要走日本仔
女：	係呀
莫：	又要驚呢樣，又要驚嗰樣。嗰陣時乜都唔使驚㗎
女：	係，有人照顧了？
莫：	咁有嗰麼多小朋友
女：	係係，咁你喺度識唔識到啲好朋友啊？
莫：	冇，唔識得。
女：	嗯哼
莫：	嗰陣時細路仔根本就……即係大家都有交情，你又唔認識我，我又唔認識你

女：	係係係，啱啱
莫：	又有話你睇我唔起，我睇你唔起，冇呢啲咯嘛。總之大家就……
女：	係係，大家都係一齊咁嘅
莫：	係嘅
女：	嗯嗯
莫：	咁……
女：	咁去到仁化了嚟？
莫：	去到仁化了，去到江頭鄉啊。
女：	係，江頭鄉
莫：	江頭鄉……又……我記得呢他就……入邊一排好多祠堂嘅
女：	哦
莫：	嗰啲祠堂，咁祠堂旁邊呢有條路，一路行出去有個……舊時啲鄉下好興有個門口咯嘛。咁嗰度出去呢就有條河嘅了，就喺丹霞嗰度有條河啊
女：	哦哦
莫：	咁咪沖涼啊，洗面啊，都喺嗰條河嘅了。
女：	嗯嗯
莫：	咁嗰條河唔係直咯嘛，咁嗰啲男先生帶著我們喺這一段
女：	哦哦
莫：	咁咪轉個彎，嗰邊呢就嗰點女先生就同啲女同學喺度
女：	係係
莫：	大家睇唔到咯嘛
女：	分段嘅？
莫：	分段嘅
女：	嗯嗯，你們嗰間學校就喺河邊嘅？
莫：	喺河邊嘅。教養院間間都有河邊咯
女：	係係，即係方便啲同學
莫：	食啊，沖……梳洗啊，都方便咯嘛
女：	咁嗰時五院嘅院長係邊個？
莫：	院長就係吳菊芳啦

女：	係啦係啦
莫：	每間院有個主任……
女：	主任？係
莫：	叫做院主任
女：	係，院主任，啱
莫：	係，我記得我們嗰個院主任姓李的，李志文啊
女：	哦，哦，嗯
莫：	但係我後來都有見他了
女：	喔，沒見過他了？
莫：	即只記得他係一個……好似……院長嗰陣時……打仗嗰陣時呢，著件恤衫啊，著住馬褲這種
女：	哦
莫：	著對……他就唔係靴啦，著對鞋咁。
女：	哦……
莫：	我記得他係咁樣嘅
女：	嗯嗯，咁你入去嗰時候，五院已經有小朋友未嘅？還是說你們係第一批？
莫：	我們係第一批
女：	你們係……哦，你們是第一批，嗯哼，咁入到去都……乜嘢都係由你們開始的？
莫：	他……嗰陣時唔係，我們細個啊
女：	係嘢
莫：	咁他有安排咯嘛。
女：	係
莫：	初初未整好嘢，就咪……喺祠堂度訓
女：	哦，即係最初五院嗰啲建築物……嗰啲院舍未起好嘅？
莫：	未起好咯
女：	你們就……先住喺祠堂？
莫：	祠堂。咁咪後來呢，就……隔咗幾內我又唔……
女：	係呀，係呀

莫：	唔記得嘅了，總之後來呢，就後邊村後邊呢
女：	哦
莫：	就開辟咗一帶空地
女：	哦
莫：	咁咪四周圍都係竹樹、樹林嘅了。
女：	嗯哼哼
莫：	咁咪……院開……就起……起咗啲……搭咗竹棚啊、課室啊、宿舍啊，嗰時候
女：	哦哦，嗯嗯，咁你們……有冇叫你們幫手起？
莫：	冇咯。嗰陣時我們細個
女：	可能大啲啲啲有冇呢？
莫：	冇嘅
女：	都有嘅？
莫：	我……我……好似係啲啲機構……
女：	做嘅？
莫：	教養院起嘅
女：	嗯嗯，咁你由祠堂搬入去到院舍呢，你嗰時嘅心情點樣啊？即係叫你搬了……
莫：	好得意㗎，得意嗰陣時，冇敢想的。
女：	嗯，院舍嘅環境係點樣啊？即係你們住嗰度係唔係得一塊床啊？
莫：	係啊
女：	幾多個人一間……一個院舍咁呢？
莫：	好多人咯，一個大竹棚嘅
女：	哦哦
莫：	好大嘅
女：	好大嘅？
莫：	大過……依家啲所謂啲啲啲啲，神功戲啲啲……
女：	哦哦，即係戲棚啲啲
莫：	大過啲啲
女：	哦哦，咁住幾多人嘅？

莫：	好多人嘅，我唔記得了
女：	哦。咁你們……幾多個人一張床？
莫：	冇。他搭嘅竹棚，一排係床來咯嘛
女：	哦，一排橫過來全係床？
莫：	冇床嘅
女：	即係唔係一張張床？係一大塊板咁樣？
莫：	冇嘅。
女：	哦
莫：	你睇嗰啲照片，嗰度有一張木床兩個小孩，嗰啲根本唔係我們嘅事
女：	唔係你們嗰度？哦……
莫：	係後來……
女：	係嘢係嘢
莫：	保育院時期嘅。嗰陣時邊度有床？點做床？
女：	哦……
莫：	你成……成幾千人，你兩個人一張床，你都要一千幾百張床嘅
女：	係呀係呀
莫：	木床的話有可能。
女：	哦……
莫：	全部搭棚
女：	搭棚？
莫：	咁我們細個嗰陣時呢，就……教養院搭好嘅了
女：	哦哦
莫：	咁細路仔一……
女：	一位？
莫：	訓嗰度一個位
女：	即係一排過咁樣啦
莫：	咁多數宿舍呢，就前邊一……左邊，即係頭嗰邊一間房，後嗰度一間房，
女：	係係

莫：	有的先生喺個度住嘅了
女：	哦哦
莫：	咁我們喺中間一排細路仔喺個度訓
女：	哦哦哦
莫：	咁咪試過有啲院話……好似話搭咗兩層，我們個真是就得一層
女：	嗯嗯，你們一層個嗰？
莫：	因為我喺個度唔係好內嗰
女：	係係係
莫：	咁後來點樣我就唔知，實在喺……我喺五院大半年……大半年……
女：	咁你可唔可以講下每一日嘅生活大概係點嘅？
莫：	喺五院……上堂嘢，唱歌嘢，夜晚黑晚會嘢，係咁嗰嘛，有乜嘢特別活動咯
女：	係，咁你們大概都好早起身咯嘢？
莫：	係嘢，好早起身
女：	咁點……點叫醒你們呢？你點知起身呢？
莫：	吹號嘢
女：	啊，吹號？
莫：	好似……好似軍隊咁樣
女：	係嘢係嘢，吹號就起身？
莫：	係，你唔起身啲先生都來叫你起身咯啦
女：	咁邊個負責吹號啊？
莫：	啊？他有啲……
女：	唔係同學來咯？都係有人管著曬咯？
莫：	係呀
女：	吹號你們就起身？起身之後就……？
莫：	你唔起身就……啲啲姐姐咪叫你嘢
女：	係係
莫：	有……有鬧你咯，“起身了，起身了”咁，細路仔有嘢咯，你叫咪起嘢
女：	係啊係啊，咁起身就去梳洗？

莫：	係，梳洗
女：	嗯，跟著就……
莫：	食早餐嘅
女：	食早餐？ 㗎呢
莫：	食早餐就上堂，上堂咁樣……
女：	咁個時上堂教你們乜嘢咯？
莫：	唔記得了，教啲……
女：	係唔係分科，還是點樣咯？
莫：	唔係。國文啊，算術啊個啲咁嘅嘢
女：	哦哦，係唔義係教院自己有課本嘅哦好似，係唔係？
莫：	唔係，後期嘅
女：	後期嗰？ 你們個時未有嘅？
莫：	到……到……我諗到我們個陣時就開始有……就有課程咯，因為個陣時未有正式學校，即係先生教乜嘢你就學乜嘢嘢。
女：	嗯嗯嗯
莫：	我嘅感覺就係咁，因為有……有書本呢
女：	有書，係。咁老師教乜嘢就學乜嘢。
莫：	係啊
女：	咁你有冇印象，個時最深刻你學過啲乜嘢？
莫：	冇印象了
女：	有冇教唱歌啊？
莫：	有，唱歌仔呀個啲有啊，有啲抗戰歌曲啊咁，又分唔出嘅了，總之細路仔個陣時
女：	咁義教院唔係自己有院歌嘅？” 新生兒童大合唱” 個啲有教你們？
莫：	我……入咗五院之後，差唔多很多個月先正開始教院歌
女：	哦哦，咁你入義教院大概係 38 年咁樣，還是 39 年啊？
莫：	39 年
女：	都 39 了㗎。㗎呢，係。咁你話你喺個度大半年就走，點解大半年你就……
莫：	吶，我入咗去五院

女：	係嘢
莫：	咁咪學……同學就越來越多啦，咁咪後來呢就到……下半年了……下半年就……
女：	即係你去嘅時候應該係冬天上半年嘅？
莫：	上半年
女：	噢噢
莫：	咁下半年呢就……辦中學了。
女：	辦中學了？哦……
莫：	辦中學，有小學了
女：	嗯嗯
莫：	咁咪就叫實驗小學、實驗中學了
女：	係係
莫：	咁點解叫實驗中學呢？因為嗰陣時就因為學……少……我嘅諗法呢
女：	係
莫：	就係學生太多，咁你應該俾他們有出路嘛。
女：	係，係，㗎
莫：	咁就中山大學嗰陣時，好多……我們好多先生都係中山大學畢業嘅
女：	哦……
莫：	因為打仗嗰陣時畢業，你都有地方去啦，咁咪院長咪請曬他們來㗎
女：	哦哦。院長也喺中山大學讀過書嗰時候？
莫：	他讀緊書，讀緊書……後來他辦呢樣他又唔讀咯嘛。
女：	係係
莫：	咁咪後來……輕鬆㗎了他先正又繼續讀到畢業咯嘛
女：	所以你們好多老師呢其實係中山大學嘅學生來嘅，畢業嘅？
莫：	係呀，畢業嘅了
女：	咁就辦實驗小學、實驗中學啦。咁你點諗呢，嗰時候？
莫：	所謂實驗中學、實驗小學呢，它就……本來就六年制咯嘛
女：	嗯
莫：	咁它就縮短㗎它

女：	係
莫：	就四年嗟嘛
女：	係係
莫：	咁所以叫做試驗嘛，叫做實驗嘢
女：	即係六年改為四年嘅了？
莫：	咁咪……據我……我後來入咗應該之後呢，大概一年到啦，又教育……教育部唔准了
女：	嗯嗯
莫：	咁唔可以辦……縮短
女：	係
莫：	咁要辦返……
女：	正規嘅？
莫：	正規六年，咁所以後來實驗中學冇咗了，就改做力行中學
女：	力行中學，冇錯，冇錯，你都好清楚呢段歷史喔
莫：	我記得，我入教養院之後就記得了，因為……因為院長同我講咁嗟嘛。
女：	係，哦。
莫：	咁……
女：	所以力行都係六年制嘅了，又要改返？
莫：	係，咁我……我……我們個陣時就，我……我嘅，我……我就嘅……五院啦，五院咁咪開辦實驗中學嘅了
女：	嗯哼
莫：	咁呢就所有院的學生都要考試。
女：	哦
莫：	即係你嘅程度係夠嘅，嗰啲……嗰啲啊先生都知道你係乜嘢程度咯啦
女：	係呀係呀
莫：	所以沒嘅學校……喺院入面沒分幾年級，但係他們教你嘅時候
女：	係
莫：	就係呢組教乜嘢，嗰組教乜嘢咁，他們已經差唔多有曬程度嘅了嘛
女：	哦哦……

莫：	咁咪啱程度嘅，全部就參加考試
女：	嗯嗯
莫：	咁你咪去考嘢
女：	嗯嗯
莫：	咁我唔理咁多，他話可以去考，咁我又去考嘢
女：	嗯
莫：	我又考到
女：	嗯？你考到？
莫：	咁咪……
女：	即係你考得幾好咯嘢？
莫：	可以咁講嘢（笑聲）因為我……我博了幾年中、英、數，嗰陣是唔係冇，冇第二樣嘅，中文、英文、算術嗰嘛
女：	嗯嗯
莫：	你小學冇第……第二樣的
女：	嗯哈哈
莫：	中、英、算，咁我喺廣州已經學咗嗰啲底嘅度
女：	哦哦哦
莫：	所以我覺得很容易啊，一考咁咪又俾我考到了
女：	係
莫：	咁就送咗去實驗中學嘢
女：	實驗中學？係。咁嗰時實驗中學唔係喺江頭鎮嘅嘢？
莫：	唔喺了，唔喺了，喺韶關咯
女：	咁你又返番去韶關啊？
莫：	送返我們出去嘢
女：	哦，考到嗰啲就送返去韶關？
莫：	係
女：	就入讀實驗中學啦？
莫：	係，入讀實驗中學
女：	哦哦。咁嗰時候你都很細嗰？十二……

莫：	十二歲到嘢
女：	係呀，十二歲嘢
莫：	十二歲到嘢
女：	係嘢係嘢，哦。咁所以你喺五院大半年，就返去韶關了？就讀實驗中學了？
莫：	係
女：	嗯，咁實驗中學當時係唔係……嗰個規模……係唔係俾你嘅印象點呢？
莫：	嗰陣時，實驗中學呢就喺個山崗度嘅，咁好似依家個山……
女：	係
莫：	中間一個窩咁
女：	哦
莫：	開關咗做大禮堂，咁咪開會呀，唱歌呀乜嘢都喺嗰度嘅了
女：	係係
莫：	咁咪個個人都有張凳仔嘅，喺……喺教養院就最興俾張凳仔
女：	係係
莫：	咁咪上堂呢大家搬凳仔
女：	拿著啲凳仔去？
莫：	係呀
女：	嗯呢，咁你們實驗中學……係唔係第一批嘅，你係？
莫：	係呀
女：	第一屆？
莫：	係呀。
女：	哦
莫：	咁嗰陣時實驗中學呢，已經起咗好多個課室嘅了
女：	係
莫：	即係一個棚咁，一個個課室嘅了，咁我們入到去……
女：	你第幾班嘅，咁入去有冇話嘅？
莫：	入去……得一班嗟嘛
女：	得一班嘅嗟？

莫：	我們嗰陣時……
女：	哦，你們嗰陣時得一班嘅嗟？你係第一班？
莫：	係
女：	哦……幾多人嘅有？
莫：	有……都有成三十人的
女：	哦，即係嗰三十人其實就係選出來比較叻咯了哦？
莫：	喺……教養院……係嘢
女：	係嘢係嘢
莫：	咁咪我聽……我記得呢後期，大概一年到啦
女：	係
莫：	就……相對啲程度參差了，你喺各院考都可能有直接去參選，就要集訓了
女：	哦……
莫：	我們嗰陣時就……去到就開學了
女：	係嘢係嘢
莫：	咁咪後期嗰啲呢就要……
女：	就要集訓？
莫：	集訓，再……
女：	再揀？
莫：	再揀過，即係再考過試，可以講係選拔啦
女：	係嘢係嘢
莫：	然後先正又得……
女：	哦……咁你入去實驗中學度讀書呢，係唔個課程同五院又唔同曬嘅了？
莫：	唔同嘅了
女：	係啦係啦
莫：	但係要抄嘢
女：	要抄？
莫：	沒書咯
女：	哦……沒課本俾你們嘅？

莫：	冇課本嘅
女：	抄書了喔？
莫：	抄寫黑板，你咪抄曬嘢
女：	咁有紙俾你們嘅，有簿？
莫：	有
女：	有筆俾你們？
莫：	紙簿有
女：	咁你們住喺邊度？
莫：	咪又……他有宿舍咯
女：	他有宿舍，哦哦。咁宿舍係唔係啲，都係啲棚來嘅？
莫：	都係竹棚，全部都係竹棚嘅，一個一個一個
女：	哦……
莫：	呢度係課室，呢度係宿舍，呢度係飯堂咁嘢
女：	哦哦。咁但係都係全部人一齊住咁嘅？
莫：	嗯？
女：	即係全部人住曬一齊係唔係啊？
莫：	係嘢係嘢。即係你個班就喺個度
女：	哦，你個班就喺個度
莫：	後來就好多咯嘛，越來越多……班數咯嘛
女：	嗯哼。咁但係你就係第一屆生……頭屆生入去嘅？
莫：	係呀
女：	嗯。咁個時的校長係邊個？有冇印象啊？
莫：	冇校長嘅，有個主任嘅
女：	冇校長，有個主任？
莫：	叫做 <u>陳洪有</u>
女：	哦，陳洪有
莫：	他係喺學術界應該都好出名咯
女：	係。邊個“洪”啊？
莫：	洪水嘅“洪”

女：	洪水嘅“洪”？哦……
莫：	“有”是有冇嘅“有”
女：	喔，主任就係陳洪有
莫：	係啊。
女：	嗯嗯
莫：	好好……好好人嘅。咁咪……但係他好近視眼嘅
女：	哦哦
莫：	但係個個都……
女：	尊重他？
莫：	尊重他㗎。
女：	哦哦
莫：	咁咪但係你知啦，細路仔好壞咯嘛
女：	嗯嗯
莫：	咁他又……他又大件肥㗎，個肚臍嗰度條皮帶咪係掉下來啦
女：	嗯
莫：	咁咪起個花名叫做“斜皮帶”
女：	斜嘅？
莫：	斜皮帶啊
女：	哦，斜皮帶
莫：	嗰啲軍官嗰啲唔係有條嘅？
女：	係呀係呀。哦，即係自己私下，自己啲同學仔喺嗰度講？
莫：	係係，講笑嘅。但係他對我們好好的，對我們啲學生好好嘅
女：	係。咁你喺……呃……實驗中學讀咗幾多年了？
莫：	我讀咗一年唔到
女：	哦，一年唔到就走了？
莫：	咁我……我……吶，你都睇到啦
女：	嗯
莫：	就……4……好似41年，唔係，41年就……40年就入實驗中學啦
女：	係呀係呀

莫：	咁咪 40 年下半年咯嘛。咁咪後來又……喺中學嗰度，喺實驗中學嗰度，又……組織搶救隊 嘍
女：	又有組織搶救隊？
莫：	咁我又去咗了
女：	組織搶救隊係乜嘢意思啊？
莫：	係……
女：	即係叫啲學生？
莫：	即係去戰區……
女：	搶救啲兒童？即係你做返以前嗰啲姐姐、哥哥做嘅嘢了？
莫：	係
女：	哦，但係……即係它叫啲同學參加啊？
莫：	係，十二人，選咗十二個人
女：	哦，選咗十二個人？哦……
莫：	咁啊可能我嗰陣時係一路又喺……喺四邑
女：	哈
莫：	新會即係四邑啦
女：	嗯
莫：	喺四邑搶救出來咯嘛
女：	係
莫：	咁咪嗰十二個人招嘅呢，大部分都係四邑出……出去嘅
女：	嗯，哦……
莫：	咁你比較熟嗰個區咯嘛
女：	哦……
莫：	咁咪有啲……有……有幾個大嘅呢就負責……煮飯啊，即係食……食啊、帶隊啊嗰啲嘍
女：	嗯嗯嗯
莫：	咁我就去到……
女：	咁但係點解你嗰陣時諗到要去參加搶救隊嘅？
莫：	唔到你嘅，

女：	哦，他揀嘅？
莫：	中學……中學揀咯嘛
女：	哦……他揀出來嘅
莫：	係啊。教養院……叫實驗中學，你們要派一隊去搶救……
女：	哦，就選咗你？
莫：	就一定要係那裡啲人
女：	哦……就……所以就……咁咪就咁啱，所以你又有？
莫：	咁我又係四邑嘅
女：	哦，原來係咁
莫：	就選咗我去㗎，我諗咯嗰，因為我們……個個都熟個度嘅
女：	係，係
莫：	咁我們去到都係行路嘅
女：	咁冇問你嘅？總之揀到你你就去嘅了？
莫：	冇嘅，學校要我們咁
女：	哦……咁但係你去咗，你就變咗冇得讀書了，個段時間？
莫：	係㗎
女：	係唔係啊？
莫：	係啊，咁……
女：	嗯哦。咁所以大……嘅……嘅實驗中學大概一年嘅啱讀咗？
莫：	嗯……可以咁講。
女：	咁……係啦，大致上咁樣。入咗搶救隊了？
莫：	嘅搶救隊唔係好內嗰咯的
女：	哦，唔係好內咯嗰？
莫：	嘅搶救隊……我……唔記得了，我相信都唔使一個月
女：	哦，咁咪返番學校嘅了？
莫：	係呀，返學校
女：	咁你們入了搶救隊，使唔使訓練你們嘅，教你們嘅？
莫：	冇嘅。

女：	冇嘅？
莫：	冇嘅。咁其實就唔使點訓練嘅。你帶……帶班細路，你負責幾多個，你負責幾多個
女：	哦，每人照顧一……一啲？
莫：	咁啲大個啲啲做阿頭嘅
女：	係
莫：	咁一個先生
女：	係
莫：	咁個先生呢就……就教你們點樣點樣咁睇著曬
女：	哦哦
莫：	咁咪去交涉乜嘢就係嗰個先生去做
女：	哦哦。咁你又返番鄉下㗎？
莫：	係呀。返番嗰陣時，新會就已經冇嘅了，
女：	係係
莫：	已經……淪陷咗嘅了
女：	嗯嗯
莫：	咁我去……去到……嗰陣時就只能夠去到臺山
女：	去到臺山嗟？哦哦
莫：	臺山……三阜㗎
女：	去三阜咁就係嗰度搶救了？
莫：	係嗰度……係嗰度三阜也有啲祠堂咯嘛，他……姓餘嘅
女：	嗯
莫：	咁最多人咯嘛，係三阜嗰度嗰個荻海啊
女：	荻海？邊個“荻”啊？
莫：	草花頭嗰個“荻”， 荻仁傑嗰個“荻”
女：	哦哦哦，係係
莫：	海……海棠嘅“海”㗎
女：	係係係
莫：	咪荻海。他三阜嘛

女：	嗯
莫：	三阜他有一個荻海，一個新昌，一個長沙咯嘛
女：	哦，嗯嗯
莫：	叫做三阜咯嘛，咁我們又去到荻海嘍
女：	嗯嗯
莫：	喺荻海度有間祠堂，它姓餘咯嘛，有個餘家祠，就幾大嘅
女：	哦哦
莫：	咁咪喺嗰度做基地嘍
女：	哦……
莫：	做基地，嗰陣時我有個……有個大家姐呢，十……她大我十幾年咯嘛，嗰陣時她結婚嗰時候，我諗都係嗰啲古老嘢咯
女：	係係係
莫：	咁但係她喺三阜呢就……因為好好……好……土嘅了，咁她喺嗰度，她有啲子女咯嘛
女：	嗯……
莫：	我去到，咁梗係搵到她啦。她……她嗰陣時……咁咪我又帶埋她一個仔啊，三個女啊……四個女嘍……都參加嘛
女：	哦……
莫：	咁由於她咁樣嘍，咁她鄉下嗰啲人啊，都靠得住啦，你知嗰陣時好驚咯嘛
女：	係呀
莫：	政府搵咗你啲細路，唔知係去做乜啊，當兵嗰啲嘍
女：	哦，我明
莫：	咁由於我已經做生招牌了，家姐嗰啲子女又跟我嘍
女：	哦……
莫：	咁她啲鄉下嗰啲人啊
女：	就知道？
莫：	知道了，個個都信，咁咪好快就已經成百幾人嘅了
女：	係呀？哦……
莫：	咁我們就返去……返學嘍

女：	哦哦。搶救到了，就返去？
莫：	係呀，帶返番去
女：	哦哦，咁樣
莫：	帶返去韶關之後，就交俾教養院
女：	嗯嗯
莫：	咁我們就返學嘅
女：	任務完成了？
莫：	係，咁樣嘛
女：	哦……咁你嗰次返去新會呢，有冇啲特別嘅感受？
莫：	都有嘅了
女：	都有了嘍？
莫：	冇了
女：	你有冇諗過返去搵……即係媽媽唔喺度嘅了嗰時候？
莫：	冇，已經唔喺度嘅了
女：	係喔，係喔。咁咪有乜特別，即係鄉下有乜特別咯？
莫：	冇了。新會都有得去了
女：	冇得去？係嘅
莫：	喺臺山……臺山就根本只係我家姐喺嗰度
女：	係嘅係嘅
莫：	我都唔喺我啲鄉下
女：	嗯嗯，嗯嗯
莫：	所以有乜特別感覺嘅
女：	係。咁你返番去實驗中學之後又繼續上堂了喔？
莫：	返去即刻繼續上堂
女：	係嘅係嘅
莫：	咁但係，返去之後呢，到……41 年……
女：	嗯哼
莫：	41 年啊，即係第二年，都係……差唔多第二年嗰嘛，41 年年尾，就……招考海軍了
女：	係。你點知有一個咁樣嘅招考呢？

莫：	咁咪學校有咯嘛
女：	哦，宣告的
莫：	學校……學校保……介紹你去咯嘛。
女：	哦……
莫：	因為一有乜嘢機會呢，他就叫你們啲人……學生去嘅了
女：	哦……
莫：	你即係夠年齡就去嘅了
女：	係係
莫：	咁嘅，咁我……
女：	哦……咁你點樣考慮呢當時？
莫：	當時冇啊，他話十四歲咯嘛
女：	哦哦
莫：	咁我咪話我十四歲㗎。
女：	你自己講嘅？（笑聲）
莫：	數手指我係叫做十四歲咯嘛
女：	係呀，虛齡㗎
莫：	係啊，咁咪虛齡……
女：	因為你係 28 年咯嘛
莫：	嗰係假齡，唔係虛齡
女：	假齡……
莫：	假齡，出世就當一歲咯嘛。咁咪學校保送去嘅，
女：	係
莫：	學校保送去，咁咪……
女：	但係學校使唔使揀學生，還是你說去就去？
莫：	冇。吶，依家有個咁嘅機會
女：	係
莫：	省政府……海軍招考，省政府選人保送
女：	嗯嗯

莫：	咁你們……
女：	想去嘅？
莫：	想去嘅，咪就報名㗎，去報名去考嘛。咁咪我個陣時，事實上呢自己知係話可以去當海軍
女：	哦哦……
莫：	去打日本仔
女：	哦哦……
莫：	知呢兩個……
女：	哦，即係呢兩個諗法咯嗟？
莫：	其他冇感覺嘅
女：	係係。就覺得……啊係……不如……招海軍，我又可以打日本人，我就去啦，試下啦
莫：	係，咁咪去考㗎
女：	係啊。去邊度考啊？
莫：	喺省政府……考嘅㗎
女：	即係韶關個度，曲江個度？
莫：	韶關個度。它咁樣嘅，它分區嘅
女：	嗯
莫：	個陣時廣東仲有好多地方未淪陷咯嘛，即係……吳縣啊，吳川啊，即……即係西部啦
女：	嗯
莫：	西部……陽江再落個度，吳川，即係……李……李漢文將軍嘅家鄉
女：	係係，家鄉
莫：	喺個度
女：	哦……
莫：	個度有一區啦
女：	嗯
莫：	咁咪……韶關一區啦
女：	係
莫：	咁咪梅……梅縣啊
女：	梅縣？

莫：	所以……即係東江嗰邊了，咁就有一區啦，咁咪香港有一區嘛
女：	哦，香港都有嘅？
莫：	有。香港嗰時未淪陷咯嘛
女：	係
莫：	咁咪……
女：	唔係喔，香港 1941 年 12 月就淪陷咯了喔
莫：	係呀。考咗咯嘛
女：	嗯哈
莫：	考咗之後咯嘛
女：	係，考了之後。就……你喺邊度考咁樣？你喺韶關？
莫：	我喺韶關
女：	你喺韶關啊，考乜嘢嘅要？
莫：	好誇張嘅，嗰陣時，他們當得呢啲係好……好難得嘅機會
女：	係
莫：	而且覺得好似……好……即係非常之好嘅機會
女：	係係
莫：	所以考嗰時候好嚴
女：	好嚴……
莫：	咁咪……講起來好似我誇張了，我考嗰陣時候，韶關嗰個區正取取三個
女：	哦。咁有幾多人考啊？
莫：	成……有成……有成好多人的。咁就正取三個，備取十幾個
女：	哦哦哦哦
莫：	咁咪一共二十人到啦。
女：	哦……
莫：	咁呢就……正取三個呢，就好少嘅，第一名呢，第一個姓羅嘅
女：	哦
莫：	係我……係我同班嘅
女：	係你同班啊？

莫：	後來入海軍就係同班咯嘛
女：	哦哦，入咗去之後就係同班
莫：	係
女：	係係
莫：	第二名係我
女：	哦哦哦，噲哼
莫：	咁咪第三名呢，一個姓何嘅
女：	姓何？哦哦
莫：	咁咪姓何個呢，就唔係考嘅了
女：	哦
莫：	他係……咁後來……他入咗學校之後，他就……唔夠一年就開除咗他了
女：	係呀？哦……
莫：	咁日後見到他，我問他，“喂，你憑乜嘢考第三啊？”咁他話，“我哥係軍長嘛。”
女：	係呀，哦……
莫：	笑聲。笑到肚疼
女：	係，所以……其實即係嘅嗟
莫：	其實他係咁樣嘅
女：	係係
莫：	咁考咗之後我們兩個人了，嗰個姓羅嘅呢一直……全國他都考第一嘅
女：	哦，好叻嘅喔
莫：	係啊，咁我呢……
女：	他都係廣東人？
莫：	廣東人。
女：	哦……
莫：	咁我喺全國考呢又係第二名
女：	係呀？
莫：	咁咪我們兩個就算係……真好老友了
女：	係啦係啦

莫：	咁但係兩個都很差的。
女：	係
莫：	他係軍人家屬，咁咪方好嘅啦
女：	嗯嗯
莫：	咁咪又係著……著嗰套軍裝，好似乞丐咁啊
女：	嗯
莫：	咁我又著嗰套軍裝，好似乞丐咁啊，又瘦啦。
女：	係
莫：	咁咪……所以呢體檢呢，他又唔使體，嗰個姓何嘅唔使嘅
女：	哦
莫：	但係我同……姓……姓羅嗰個呢就要體檢嘅
女：	哦哦
莫：	因為你嘅樣，正所謂我們嗰陣時正樣衰嘅嘛
女：	嗯嗯嗯
莫：	咁咪體檢嗰陣時候呢，就……走去衛生院啦
女：	嗯
莫：	嗰陣時叫衛生院啦
女：	嗯
莫：	走去衛生院體檢，咁咪一體呢，個醫生，“你肺病，你照肺。”
女：	係呀？
莫：	要照肺，咁冇啊，我們兩個傻梗梗咪走去照肺㗎
女：	係㗎 (休息 01:00:07---01:04:26)
莫：	頭先講到邊了？
女：	頭先講到……海軍嗰度體檢喇，好誇張嘅你話，得三個人呢，咁你……你……
莫：	其實就好多人都要體檢，其他嗰啲有冇去我就唔知㗎
女：	即係正取三個人，咁你同姓羅嗰個呢，姓羅嗰個就唔使體檢嘅？
莫：	要
女：	都要？

莫：	我同他……
女：	你同他都係
莫：	因為他係軍……軍眷囉
女：	嗯哈
莫：	軍人家屬，都唔係有錢嘅啦
女：	咁你們要驗肺，照肺？
莫：	嗰個人就話我們兩個肺病
女：	係啦
莫：	照肺……咁但係同時呢，因為嗰陣時當好大件事咯嘛，就報紙都有埋，咁咪學校知道咗我考到了，就即刻打電話俾啊李夫人
女：	哦……
莫：	即係院長啦
女：	係
莫：	話我考到
女：	嗯
莫：	咁她一聽到話我考到呢
女：	係
莫：	咁她都很高興咯嘛
女：	係啊係啊
莫：	就要見我……
女：	哦……
莫：	咁但係學校……
女：	即係報紙賣咗之後，先學校就知道？
莫：	係
女：	再通知啊吳菊芳？
莫：	係，話我考到了
女：	係呀係呀
莫：	咁他就即刻去打電話搵我嘞，叫他來找我囉
女：	叫邊個啊？

莫：	即係叫學校……
女：	哦，叫學校？即係實驗中學個度？
莫：	係啦。咁咪學校話他去咗驗身哦
女：	嗯哼
莫：	咁她可能……他們個啲知道啲官場個啲衰嘢啦
女：	係
莫：	咁他就打電話去衛生院搵。
女：	哦哦
莫：	咁我就睇見個護士，我們兩個傻……傻仔啦喺度等著照肺咯嘛。咁喺度等，咁我睇到護士喺度聽電話，“係啊係，夫人，係，有有有”咁
女：	哦……
莫：	講完一大輪之後，“邊個係莫如光！”
女：	係
莫：	咁我話係我，“聽電話！”。
女：	哦哦
莫：	咁我咪走去聽嘍
女：	嗯
莫：	聽……點知就係院長
女：	係
莫：	她話，“點解你考唔話俾我聽啊”。咁我實在，咁我考試……
女：	阿……吳院長係唔係講廣東話嘅呢？
莫：	講廣東話嘅
女：	係
莫：	咁但係三萬幾人，點會……
女：	諗著唔會……
莫：	你考試都要話你聽啦
女：	係呀係呀
莫：	咁即係她好關心啦

女：	很關心，仲好開心添喔她
莫：	係啊。她話咁你依家喺度做乜嘢？
女：	係呀係呀係
莫：	我話，“醫生話我肺病哦”。咁因為……
女：	哦……
莫：	不可能咯嘛
女：	係呀
莫：	假如我喺教養院有肺病嘅話呢
女：	教養院就好麻煩……
莫：	醫院都要……
女：	係呀
莫：	教養院啲醫務處啲醫生都要睇我咯嘛。
女：	係呀
莫：	咁她知道唔係路啦
女：	係啊係啊
莫：	咁咪所以即刻打電話去搵我們嘛。
女：	哦……
莫：	我話“醫生話我肺病哦”咁，咁她就即刻“你俾返他聽”
女：	哦哦
莫：	她就叫啲醫生聽咯嘛
女：	係係
莫：	咁醫生咪出來，“你們兩個唔使驗了！”
女：	哦，唔使照了？
莫：	係。“李夫人叫你們返去。”
女：	哦哦
莫：	咁我們咪返去囉
女：	哦，咁吳菊芳就真係……
莫：	沒驗到
女：	即係好彩啲個電話喔

莫：	她救咗我們
女：	係嘢係嘢，但係你應該有肺病嗰時候？
莫：	邊度有嗟，有肺病……有肺病嘅學校都唔得咯嘛
女：	咪係，係啊係，所以就唔使你照了？
莫：	即係……即係嗰啲……官場嗰啲嘢，他認為好巴閉㗎啦，，（一聲令下）就叫人重考了嘛，（即使）你考過了
女：	即他一聲……
莫：	咁人考過嗟嘛，你考到……咁你要……
女：	係唔係都係吳教院嘅光，即係吳教院嘅……成績啦，都好啊
莫：	係啊，但係好……他嗰陣時，我睇係“先敬羅衣後敬人”啦
女：	嗯嗯
莫：	睇見啲咁嘅人
女：	係啊
莫：	好似……好似乞丐仔咁嘢
女：	嗯嗯
莫：	咁你有乜嘢資格啊，咁喔
女：	係係
莫：	話我肺病嘢
女：	哦……明白，哦原來咁樣
莫：	後來就有照肺了，咁咪返咗去了
女：	好彩吳菊芳個個電話喔又
莫：	係呀，好彩她睇到嘢
女：	係呀，係呀。但係她都好快，識得打電話
莫：	係呀，可能她即係知道官場嗰啲嘢
女：	啱啱
莫：	因個我肺病嘅話，喺教養院都唔得咯嘛，都要入……入去醫咯嘛
女：	係係，哦……原來係咁。咁跟著就返番去……係唔係跟著就去見吳菊芳啊？
莫：	係啊

女：	哦哦
莫：	直接返去見她的
女：	即係返學校就見她了？
莫：	係……所以我係第一次見她㗎
女：	喺邊度見她啊？
莫：	喺……喺她辦公嘅地方
女：	哦
莫：	喺總……喺教養院總院
女：	哦，總院，係，總院㗎。咁你係唔係第一次去總院啊？
莫：	係呀，第一次入去咯。我喺實驗中學咯嘛
女：	係㗎係㗎係㗎
莫：	它即好似咁啊，呢一墩係實驗中學，又課室，又宿舍咁
女：	嗯哼
莫：	嗰邊呢……嗰邊呢就一墩係總院，咁又小學，又乜嘢咁
女：	即係平時好少去嘅？
莫：	好少，冇需要去咯嘛
女：	係係係，哦。咁你記唔記得吳菊芳她同你傾點乜嘢咁？
莫：	一見到她就……她好高興啦
女：	即係義教院其實咁樣即得你一個嗟㗎？
莫：	見她？
女：	唔係，考到海軍啊
莫：	嗰陣時係……係一個
女：	係㗎得你一個嗟㗎？
莫：	實驗中學得我一個
女：	係㗎係㗎，係㗎係㗎，咁咪真係好光榮㗎
莫：	嘿，我覺得好乜嘢㗎。
女：	嗯哼
莫：	即係好好彩嗟嘅
女：	係係

莫：	咁她……
女：	她講乜嘢啊？
莫：	咁她……她即刻拍我，話“點解你唔話俾我聽考試呀”咁。
女：	嗯哼哼
莫：	咁我……我點講嗰，哈，你三萬幾人之中，你一個，你點會……你點可以一定見她……除非你有事嗰？
女：	係。係唔係仲有其他人考咯嘛，係咪？
莫：	係
女：	係實驗中學？
莫：	啲啲唔得
女：	係啦
莫：	係。咁同時另外有一個考到啲個……啲個院，宜家叫做文幹啲個呢
女：	哦，文幹？
莫：	他係備取嘅，就係……
女：	哦，他係備取嘅？
莫：	第二個地方考咯
女：	哦哦，就唔係義教院考嘅？
莫：	唔係，但係都係義教院嘅人啦，所以得兩個人㗎，但係他……我係啱關就係實驗中學得一個人嘅度。
女：	係係
女：	咁她就話你點解唔話俾她聽啊？
莫：	啊，她嘅意思……她係關心
女：	係
莫：	但係……喺我來講嘅話，我點話俾你聽呢
女：	係呀，係呀係
莫：	輪都未輪到我同你講嘢啦
女：	嗯哼
莫：	咁我係第一次見她
女：	哦哦

莫：	正式見她
女：	係係
莫：	以前係知道呢個係院長，咁她也唔會搵我，我也唔會搵她，就係咁樣第一次見她㗎
女：	哦哦。咁她……呃……問完你有冇同你……鼓勵你或者其他嘢？
莫：	有，她……她……點樣讀書啊，
女：	係
莫：	要勤力啊，要讀乜嘢啊咁，教……教咗好內
女：	係
莫：	教咗好內，她話，她又睇下啲嘢，她話，“咦，你未夠年齡嘅㗎？”咁我話，“我話我十四歲，佢俾我考了。”
女：	係啊係呀
莫：	咁我咪考到㗎。她話，“你知唔知啊？”咁“我知”，我話，我知啊，十……十足年齡，十四歲，體重幾多磅。
女：	係係，㗎
莫：	她話，“係呀”，佢話“你十四歲咯嘛，你邊度有十四歲了”
女：	係啊
莫：	咁我話，“我話十四歲佢俾我考了”。她話，“咁唔好嘅，我寫張證書俾你啦”。
女：	哦
莫：	所以喺嗰個難童的母親，嗰度入邊有我張證書咯嘛。
女：	係，㗎㗎
莫：	“咁我寫張證書俾你啦。”
女：	哦，你就保留……一直保留嘅㗎？
莫：	係
女：	㗎㗎
莫：	咁她就叫文書過來，寫……寫兩張咯嘛。嗰陣時沒複寫紙嗰啲嘢嘛
女：	係呀係呀
莫：	咁她就寫咗兩張
女：	㗎㗎
莫：	咁咪證明我喺實驗中學……實驗中學四年制，寫埋“四年制二年級讀書”

女：	哦，係
莫：	咁即係二年級你話一……得嘅，你話中一又得，話中二亦得
女：	係係
莫：	小學程實夠啦。咁她話，“你……我寫你十五歲。”
女：	係
莫：	咁我話點解啊，我實歲大咗嘅嘅，她話“十五歲呢係我們中國人的虛齡”，
女：	啊……
莫：	咁咪“十足年齡應該係十四歲”
女：	哦，咁她都好仔細哦
莫：	係。咁所以她話“我寫你十五歲，十三歲你唔得嘅了”
女：	係，哦，咁她都幫你喔
莫：	係，咁咪有嗰張證書嘅
女：	係係，係呀係呀
莫：	咁咪後來啊關爾強咁同我登咗落去……
女：	喺，喺
莫：	嗰本書嗰度嘅
女：	係係係
莫：	咁樣就入……入海軍嘅。第一次見她，咁以後就……即係她當我係仔，我當她係阿媽咁嘅
女：	係嘅係嘅
莫：	咁她呀……
女：	她都知你屋企情況係咪？有問到你嘅？
莫：	知……
女：	係嘅係嘅
莫：	她問我阿媽怎樣，我話，“阿媽唔喺度了。”
女：	係係係
莫：	咁她話，“咁我都係阿媽啦。”我話，“系啊系啊”
女：	係嘅係
莫：	咁她後期……後期她喺美國返……香港呢，她都……要我探下太太啊

女：	喔？係啊？
莫：	帶埋啲子女去見她
女：	係呀？哦……
莫：	咁我……唔係……
女：	哦……即七十年代嗰時？
莫：	係。她返過來香港兩三次嘅
女：	係嘢
莫：	她每一次都……都要……
女：	都通知你？
莫：	要通知我，要我去探她。
女：	你嗰陣時仲未去加拿大嘅？
莫：	未
女：	哦哦
莫：	咁要……要……咁我第一次見她，我話
女：	係呀
莫：	我話，“咁我叫你院長，他們叫你做乜嘢？”
女：	嗯嗯
莫：	“叫我婆婆嘢。”
女：	係呀(笑聲)。嗯嗯。好好喔，對你喔。即係但係……她去咗美國嗰時候，中間嗰段時間冇聯絡嘅？
莫：	有！
女：	都有聯絡啊？
莫：	一直都有嘅
女：	哦，一直都有嘅？
莫：	我入咗海軍之後，一直都同她聯絡嘅
女：	喔？都有聯絡嘅？哦哦
莫：	我有乜嘢事又話俾她聽
女：	係嘢
莫：	她有有乜嘢事就叫埋我，做成點

女：	嗯，她都關心你嘅
莫：	係，一直係
女：	即係自從嗰次見咗面之後？
莫：	係
女：	大家都有聯絡了？
莫：	係
女：	哦……咁很難得喔
莫：	一直都有聯絡
女：	哦……
莫：	咁她嗰陣時好多時候，因為她係政府……係……
女：	係嘅
莫：	後來係做國大……國民代表大會嘅 ， ， ，
女：	係嘅，國大代表
莫：	……嘅代表嘛
女：	嗯
莫：	咁她好多時候要去重慶開會咯嘛
女：	哦哦
莫：	咁她係詔關呢，就坐飛機去重慶咯嘛
女：	嗯嗯
莫：	但係她為咗要見我們呢
女：	嗯嗯
莫：	後來又好多同學咯嘛
女：	嗯嗯
莫：	咁她坐車啊，坐車經過貴州，咁咪走來探……睇下我們
女：	哦……即係唔搭飛機？
莫：	唔搭飛機了
女：	哦……
莫：	咁嗰陣時教養院我係第一批考到啦

女：	係呀係呀
莫：	第二年海軍又招生嘛
女：	係
莫：	咁咪又有同學去考嘛
女：	係係
莫：	咁咪只有一個考到嘛
女：	哦……
莫：	就係依家喺廣州嗰個嘢
女：	哦哦……
莫：	咁咪第四……
女：	叫乜嘢名嗰個同學？
莫：	陳國和嘢
女：	陳國和？
莫：	係，喺澳洲了
女：	國家嘅“國”，和平嘅“和”？
莫：	係啊
女：	他就係第二個考到了？
莫：	係
女：	哦哦
莫：	咁咪第一……可以講第一屆……第一屆就係兩個啦，第二次就陳國和嘢，第三年呢就有六個考到
女：	哦……
莫：	我咪叫……喺臺灣有一個啦
女：	嗯嗯，係啦
莫：	我……我……我話……
女：	高雄嗰個啦？
莫：	係係
女：	他就第三年嘅？
莫：	係

女：	係係係
莫：	高雄一個，就……呃，冇了，嗰幾個都……唔喺度了
女：	哦哦，嗯嗯。但係你同之後幾屆嗰啲都有聯絡，喺海軍？
莫：	喺海軍梗係有啦
女：	哦
莫：	低我……低過我咯嘛
女：	係呀係呀係，但係你又知他們係義教院咯嘛
莫：	知，咁院長話俾我聽邊個又考到了
女：	哦，係呀。因為你們有聯絡哦
莫：	她叫我睇……叫我……
女：	照顧呢啲，你最大。你又好似學長咁樣？
莫：	係呀係呀
女：	嗯嗯
莫：	嗰她……她又……成……成日問我有冇錢咯嘛，我嗰陣時邊有錢
女：	係呀係呀
莫：	又冇錢使，亦冇錢
女：	嗯
莫：	沒屋企嘅邊有錢呀。咁她又寄日用俾我們咁啊
女：	咁院長好照顧你們喔
莫：	係呀。她……她又驚我們……抗戰嗰時候喺軍隊
女：	係
莫：	邊度會好好養嘅嗟
女：	係
莫：	其實我們都食得最好嘅了
女：	係
莫：	咁喺海軍入邊叫做好過陸軍好多嘅了
女：	係
莫：	但係她又寄啲魷魚丸啊，又俾我們吃啊
女：	哦，咁好哦，係呀係。咁你嗰次見完院長之後，幾內之後就真去報到，去海軍啊？即係你

	講……照完肺，即刻就見院長傾計嘢
莫：	係嘢係嘢
女：	咁跟著係唔係留咗一段時間先走的？
莫：	冇幾內嘅嗰。
女：	哦？，冇幾內嘅嗰？
莫：	咁要去集中咯嘛
女：	哦
莫：	就去省政府咯嘛
女：	去報到啊？
莫：	係。省政府集中，所有……
女：	都喺曲江嗰度報到？
莫：	係呀。所有考到嘅
女：	係嘢
莫：	就喺嗰度
女：	嗯嗯
莫：	咁咪香港嗰啲又來啊
女：	嗯嗯
莫：	呃，吳川啊，東江啊嗰啲都來
女：	即係嗰一批全部集中曬？
莫：	集中曬
女：	幾多人啊嗰時嗰一批有？
莫：	有幾十人嘅
女：	有幾十人嘅？咁集中完跟著點啊？
莫：	啊？
女：	集中完之後跟住點啊？
莫：	集中完之後……幾日啦
女：	係
莫：	咁咪……啲……首長又……接見啦，很巴閉嘅
女：	咁有冇見到李漢魂啊？

莫：	李漢魂梗有啦
女：	哦哦
莫：	咁咪他下邊……他係省府主席嘛，另外仲有乜嘢警備司令啊，乜余漢謀啊
女：	係呀。哦，你都有見？
莫：	嗰啲……嗰啲都見咯嘛
女：	哦哦
莫：	當好……好巴閉的
女：	係嘢
莫：	嘻嘻，好笑，細路仔。咁咪省政府派出個人帶隊，帶我們上去重慶考試咯嘛
女：	哦，要去重慶考試的？
莫：	係呀，全國咯嘛
女：	哦
莫：	我們係廣東嘅嗟嘛。
女：	你係廣東嗰批？
莫：	係啊，咁你全國各……各處都要去考咯嘛
女：	嗯哼
莫：	咁咪廣東嗰幾個地方集中咗，喺……
女：	韶關啦
莫：	韶關嘛，咁省政府要派個人帶我們去咯嘛
女：	嗯
莫：	考唔咪要送返他返來咁嘢
女：	係係係
莫：	咁咪帶我們去，咁咪……咁咪……你知啦，我們呢啲，一來又……又窮鬼，餓啦 二來細路仔啊
女：	係呀係呀
莫：	唔識……唔識規矩嘅了嘛
女：	嗯嗯
莫：	咁咪余漢謀……余漢謀嗰個時候警備司令嘢好似，咁咪招待我們吃飯嘢
女：	係呀

莫：	要我們訓話啊，
女：	係呀係
莫：	咁咪嗰個帶隊呀……嗰個省政府嗰個帶隊嘅，帶我們去度坐地底度啦，咁咪梗係擺……擺啲茶點喺嗰度咯嘛
女：	係係
莫：	咁嗰啲將軍未出來咯嘛
女：	嗯哼
莫：	你班友喺度等咯嘛，咁咪……（笑聲）
女：	食嘢？
莫：	嘻嘻，食咗
女：	係呀
莫：	食咗，他出來都食曬了
女：	嗯哼（笑聲）
莫：	呃，好笑，細路仔嗰陣時，咁個將軍……
女：	係呀
莫：	嗰個將軍就，“嘿，點解俾冇嘢他們食嘅！？”
女：	哦，被你們食曬……
莫：	食曬……咁個啲人……
女：	係係
莫：	唔敢講我們食曬咯嘛
女：	係係
莫：	咁咪又即刻趕緊去拿食物……
女：	又加啲俾你哋？
莫：	係，哎，細路仔乜嘢都做，嗰陣時
女：	係唔係個個上下年紀嘅嗰陣時？
莫：	十四歲咯嘛
女：	係嘞，都係十四歲
莫：	咁咪，有啲……我們班呢啲第二省嗰啲呢，十七歲都有
女：	哦，大啲都有？

莫：	嗯，都係大兩歲到嘅嗰。
女：	嗯
莫：	咁但係嗰陣時冇出世紙咯嘛，任你講嗰嘛，你考到就係考到了
女：	係係，嗯哼嗯哼，咁訓話完……咁就訓話？
莫：	係嘞，訓話完了又集中番埋一齊嘞
女：	即其實呢省政府都好重視你們呢批……
莫：	係呀，他當大件事嘅
女：	係呀？很重視你們這批……
莫：	係
女：	即係考到嘅學徒嚟？
莫：	係呀，咁咪後來嗰兩批都係……都係一樣嘅
女：	係係。咁集中你們當時就唔返學校住嘅？成批……
莫：	唔返嘅了
女：	住喺政府嗰度？
莫：	住喺省政府嘅了
女：	係啦係啦
莫：	省政府就喺嗰個……嗰個叫做乜嘢……總之一個機構入邊
女：	嗯
莫：	即係好似呢度咁
女：	嗯
莫：	開個……開個大課室，俾你們喺度……住
女：	係，住，哦哦
莫：	住咗……冇幾多日嘅嗰的
女：	係
莫：	咁咪見完呢個長官，見完嗰個長官……
女：	哦……
莫：	即係……都好大件事嘅。
女：	係嘞

莫：	我們個陣時細路仔唔知啦，我考到海軍咪考到海軍㗎
女：	即唔知咁威嘅？係咪啊？
莫：	係呀，唔知咁威嘅。
女：	係啦。唔知自己咁威嘅？
莫：	係啊。咁咪幾日嗟，幾日咁咪……上韶關㗎
女：	上……重慶啊？
莫：	坐車
女：	坐車？
莫：	坐火車去……
女：	坐火車嘅？
莫：	坐火車去……去……長……去長沙，同上山差唔多啦，咁咪喺長沙呢就轉車
女：	嗯
莫：	就坐汽車去上重慶嘅了
女：	啊，坐汽車上重慶嘅？哇，都好內喔
莫：	好多日嘅
女：	好多日嘅都要？
莫：	係呀，好多日嘅
女：	因為幾遠㗎
莫：	係，但係細路仔又唔覺得辛苦
女：	哦哦
莫：	我們個啲壞嘢啊好多啊，講起來啊，原來批批都係咁嘅
女：	啊啊啊
莫：	批批都係咁壞嘅
女：	好似細路仔咁樣，呵呵。咁有得食嘅俾你們？
莫：	有
女：	照顧曬你們嘅？
莫：	好……好招呼嘅。
女：	係呀，哦……
莫：	又……煉奶啊，又……總之好多營養嘅嘢。

女：	嗯哈哈
莫：	咁你知啊，我們啊好執輸咯啦
女：	嗯嗯
莫：	因為你們……你們呢啲窮鬼。咁咪香港個啲……香港來個啲好寶貴咯嘛
女：	係啊？哦……
莫：	嘢又唔拎得起啊
女：	係啊？哦
莫：	咁咪……呢啲係笑話啦。
女：	係係
莫：	初初個陣時集中呢就……後來就……機構個度有位俾我們住
女：	哦
莫：	就住喺船度。
女：	船度？哦
莫：	個陣時韶關有條河咯嘛
女：	嗯嗯
莫：	咁很多人都……住喺船嘅
女：	嗯嗯
莫：	好似啲船屋個啦
女：	嗯嗯
莫：	咁咪喺船度，咁咪梗係我們去到了，咁咪個個……帶隊個個：“你們坐埋邊！”咁喔
女：	嗯嗯
莫：	坐埋邊搖櫓個度呢
女：	哦哦
莫：	睇嘢就睇唔到㗎，風涼涼冇你份嘅了
女：	係係
莫：	咁咪喺㗎，咁咪喺度……咁咪香港來個啲呢坐曬喺……喺個入蓬口個度啦
女：	哦
莫：	即係好似你遊船㗎坐喺前面，風涼水冷嘅嘛
女：	係係

莫：	咁就坐個度嘛
女：	哦……
莫：	咁我們又唔出聲㗎
女：	係係
莫：	冇得出聲咯
女：	係係
莫：	啊……咁咪點知呢，過咗冇幾內，忽然間個艇家話：“這麼多個人，去第二只！”，唔俾我們咗咁㗎
女：	哦
莫：	唔招呼我們了嘛，咁個個嘢……個個領隊：“過船。”咁㗎
女：	嗯哼
莫：	過船咁咪……咁個啲……個啲香港來的個啲，又要拎行李，又呢樣……
女：	係係
莫：	我們都有行李㗎，咁咪拎個包袱
女：	係啊
莫：	咁我們咪走先㗎，走咗過去了
女：	哦……
莫：	到我們咗……坐曬了（笑聲）
女：	係係
莫：	哎，好好笑
女：	好玩㗎
莫：	好玩，細路仔個陣時
女：	係呀係呀
莫：	咁咪……咁咪又要背些煉奶呀個啲一罐罐好重咯嘛
女：	哦……
莫：	煉奶啦呢啲營養品啊，又……又啲乜嘢……乜嘢營養個啲……個啲乜嘢果汁個啲嘢咯嘛
女：	哦
莫：	咁咪梗係唔駛俾個啲香港來個啲了

女：	係
莫：	咁咪我們呢啲本地嘅就要背咯嘛
女：	係係係
莫：	咁背咪……我同姓羅個個：“有冇搞錯，他們又唔使背，我們要背”咁了。
女：	係
莫：	咁咪去到衡陽，係衡陽，唔係長沙
女：	哦……係係
莫：	去到衡陽，去到衡陽就住旅館咯嘛
女：	係係
莫：	嘿，呢啲笑話來嘅
女：	係啦係啦
莫：	咁咪住旅館，咁我們……我們條氣又唔順啦
女：	係
莫：	知他們又唔使背，我們要背，咁咪搵下有啲乜嘢嘢咁
女：	係係
莫：	搵到入邊原來係啲煉奶
女：	哦哦
莫：	咁咪啲啲營養水就唔飲咯啦
女：	嗯哈哈
莫：	“哎，飲煉奶嘢。”咁
女：	係
莫：	咁鑿兩個窿
女：	哦哦
莫：	咁就飲嘢
女：	係
莫：	咁你點飲得咁多呢，而且又好稠咯嘛
女：	係啊
莫：	咁咪吹嘢
女：	哦

莫：	咁我吹你飲，呢個窿塞，去飲，飲完了，咁就扔了落去
女：	係呀
莫：	咁你飲了，你……你吹我飲，我吹你飲
女：	係係
莫：	咁咪飲完之後，扔咗出去，好似風涼水冷嘅，下邊係祠堂來嘅
女：	哦
莫：	咁就扔咗出去
女：	哦，係係
莫：	點知菩薩喺個度咯嘛，自己唔知咯嘛
女：	係係
莫：	扔咗咪係走嘞，走咗點知呢香港個啲又……告狀咯嘛
女：	他們知道了？
莫：	係。
女：	哦……
莫：	話“他們偷牛奶飲”咁
女：	係
莫：	咁個領隊話，“呃，你們都話咯啦，我們冇啊，冇偷啊”咁。
女：	係係
莫：	咁咪後來呢又俾他們話，“你睇下個下邊蒲滿曬個啲罐啊”
女：	哦……
莫：	加起來喺韶關有七八個人咯嘛
女：	係係
莫：	咁就成七、八個罐”蒲”曬喺個度……（笑聲）
女：	哦
莫：	咁他又唔好話，他又唔敢乜嘢我們嘛
女：	係係
接電話【01:26:24--01:26:40】	
女：	咁咪發現咗了？
莫：	係，發現咗他都有我哋辦法啊

女：	係呀
莫：	唔敢打我們咯嘛
女：	嗯
莫：	我們係天之驕子喔嗰陣時
女：	係呀係呀，精英來咯嘛
莫：	依依哦哦話我們偷睇咁嘅
女：	嗯嗯
莫：	咁我們就唔理
女：	所以咁即係你們嗰班……同香港嗰班就唔啱嘅啦其實喔
莫：	亦唔係話唔啱
女：	哦，即係大家……
莫：	即係他啲高級啲，有錢咯嘛
女：	哦，有階級咁樣
莫：	係啦，嗰個領隊就顧住他們，就唔顧我們了
女：	即係偏心啊嗰個領隊啊？
莫：	偏心啊，當我們係……係咁哩咁樣
女：	係呀，啊啊啊啊
莫：	咁咪姓羅嗰個又係聰明仔咯嘛
女：	哦……
莫：	，咁咪我同他講，“喂，咁早，飲曬一罐煉奶，唔知有冇……有冇事咯喔”。
女：	呵呵
莫：	咁他話，“係呀”，他話，“營養太多啊”，他話，“係呀，有事咯。”
女：	呵呵
莫：	咁我話，“咁唔好了，到時就話，‘呃，食多啲’，食早餐咯嘛
女：	係係
莫：	喺嗰度食早餐係豆漿、油條咯嘛
女：	哦……
莫：	‘食多幾條油條，就話呢，食到啲油氣肚痛，幾大都唔好認’。”
女：	係係

莫：	就會諗到呢啲喔
女：	咁個陣時細個嘅嘛
莫：	係係，咁咪食……食油條要好啦
女：	係呀係呀
莫：	咪食多幾條，他……他叫來咯嘛
女：	嗯哈哈
莫：	喺……檔……喺檔呢度，一人一張臺喺度……喺度吃嗟嘛。結果後來好咗沒事啦
女：	沒事嘅
莫：	他知道我們偷食，我們又沒事
女：	係，係，他又奈唔你何
莫：	係呀，冇理
女：	係係，所以都好多笑話嘅都
莫：	細路仔，後來幾屆……幾批咯
女：	係係
莫：	我們係第一批，
女：	係嘢
莫：	第二年又有一批啦，陳國和啦
女：	陳國和啦
莫：	係。第三年又一批啦。
女：	嗯嗯
莫：	咁咪……啊……啊徐學海就係……第三年嘅了
女：	第三批，第三年啲啲？
莫：	係
女：	嗯嗯，但係他就……
莫：	但係他就唔係教養院嘅
女：	係嘢係嘢
莫：	他即係廣東保送嘅
女：	係係係，咁……
莫：	我們傾起上來，他話“我們都係咁樣的。”

女：	哦，又係咁
莫：	個個都係食……個個細路仔
女：	嗯，係咁嘅哦
莫：	係嘢
女：	咁你們由重慶……就搭車去重慶啦，就好多人嘅？
莫：	好多人嘅
女：	咁到重慶又係點啊？
莫：	到重慶唔係又入住旅……旅店嘢
女：	嗯嗯
莫：	他……他……省
女：	有安排嘅了？
莫：	省政府俾錢咯嘛
女：	係係
莫：	咁就住旅館，咁咪海軍總司令部，個陣時就喺重慶，個個……個個地方叫做山洞
女：	山洞？
莫：	山窿個個山洞
女：	哦哦
莫：	個個地區
女：	地區名來嘅？
莫：	係呀，海軍部喺個度啦，陸軍大學又喺個度啦。
女：	係啊係啊
莫：	個啲機構……政府機構都喺個度嘅
女：	係係
莫：	即好似郊外咁嘅
女：	嗯嗯
莫：	咁啊喺個度租旅館，我們住
女：	嗯
莫：	住咗就第……第二日啊第三日呢就全國考試了，集中喺個度考試了
女：	咁係咪好多人考嘅？

莫：	係啊，全國咯嘛
女：	係嘢
莫：	全國好多人考咯啦
女：	噃
莫：	咁咪考試之後，就……出榜嘢
女：	你記唔記得考乜嘢嘅？
莫：	又係中、英、數
女：	噃，又係中、英、數？
莫：	中、英、算
女：	噃噃。就係試題咁樣？
莫：	係試題
女：	噢噢
莫：	你要做嘅，咁咪中文就寫篇文章”
女：	係
莫：	咁咪“海軍救國論
女：	題目叫做……
莫：	“海軍救國論”
女：	海軍救國論？你之前有冇人同你補習？
莫：	冇咯，冇咯
女：	唔使準備的？
莫：	冇，你都唔知考什麼
女：	係嘢係嘢。哦。咁咪你們就作文啊？
莫：	係呀，作文咁咪我……我班有個同學，就係後來做到最高級嗰個呢，他就……嘅文章好好，我都要佩服他
女：	噃噃
莫：	咁就……嗰個總司令呢自己睇到，十四歲嘅細路仔，冇理由嘅文章寫得咁好嘅嘢，咁他係貴州補錄的
女：	哦，貴州嘅？
莫：	貴州部屬？安徽人來的

女：	係呀係呀
莫：	咁……唔信
女：	係
莫：	他寫啲文章的確好，好似喺……喺個邊……個本書都有嘅
女：	嗯嗯，哦哦
莫：	《海軍救國論》
女：	啊啊
莫：	咁……他話，冇理由十四歲細路仔可以寫篇文章㗎，文縐縐嘅㗎
女：	嗯嗯
莫：	我都認為寫得好，咁……叫他來。
女：	嗯
莫：	咁咪見面，咁他係……總司令坐喺個度
女：	即時咯哦？
莫：	喺個度，俾張臺，就喺個度叫他作一篇文章
女：	啊，係
莫：	另外一篇，作一篇文章，咁咪……個副官呢就喺個度睇著他寫
女：	係係
莫：	寫咗一句就讀一句，寫咗一句讀一句，咁他聽咗四句之後，“唔使啦。”
女：	他自己寫嘅？
莫：	即係證明……他係得咯嘛，唔係吵咯嘛
女：	嗯嗯
莫：	咁他……他自己好靚仔咯
女：	嗯嗯
莫：	嘿，我有相咯
女：	哦，嗯嗯
莫：	你……你中意嘅話我第日……
女：	好啊，send 俾我睇下啊
莫：	好啊，我……我返加拿大

女：	即係你們嗰一屆的？
莫：	唔係，嗰個總司令啊
女：	哦，嗰個總司令。喔，係唔係你們嗰一屆同學都一齊考嘅？
莫：	係啊
女：	嗯嗯
莫：	嗰個總司令呢就係海軍總司令
女：	係係，好高嘢
莫：	好高級咯，嗰……嗰他又好靚仔咯
女：	嗯嗯
莫：	咁但係呢，他要……他要揀嘅
女：	係
莫：	即係你考到了，咁你要……
女：	係。咁點叫考到呢？
莫：	啊？
女：	點樣叫考到呢？
莫：	你考試咯嘛
女：	考到幾名啊？
莫：	全國考試嘛
女：	係嘢。考……收幾多人呢？
莫：	額……六十幾人啊，第一次
女：	哦，收咗六十幾人
莫：	個個他都見咯，他唔係……唔係咁隨便咯，個個都要見
女：	即係考到嗰啲，個個都要見？
莫：	係呀，個個都要見他
女：	哦哦哦
莫：	咁見他呢，他又……做得好好咯
女：	係
莫：	他……他……

女：	即係個面試啦，叫做？
莫：	係啦。他……驗色盲
女：	係
莫：	色盲咪一般報啲顏色圈圈嘅
女：	係係
莫：	驗色盲。係，呢又個笑話。咁……我喺教養院嗰陣時候好瘦咯嘛
女：	係
莫：	咁人家都話我肺病啊，你講我幾瘦。咁咪點知咁樣一路……咁多人呢，一路食點營養嘢
女：	又飲煉奶呀
莫：	係呀，去到重慶，一百磅
女：	即肥咗啊？
莫：	我一百磅
女：	啊啊哼
莫：	咁所以他……總司令呢，“咦，點解你一百磅咯？九十磅咯嗟嘛？”
女：	嗯嗯
莫：	我話唔知點解啊
女：	呵呵
莫：	我話我考嗰陣時九十磅嘛，依家喺一百磅，他就笑，“好了，算你啦，我……我俾你啦。”
女：	哦哦
莫：	咁然後就驗色盲
女：	係
莫：	色盲啊，一本書你都見過啲啲啦，一個圈一個圈
女：	嗯嗯
莫：	我話，“睇乜嘢啊”，“咁你睇下呢度有點乜嘢嘢”我話“有啊，一個圈一個圈一個圈”
女：	呵呵
莫：	“有啲顏色又唔同咯”，他話，“咁你睇清楚啲，你唔好坐……唔好坐咁埋，坐直個身”
女：	嗯，哦哦
莫：	咁坐知一睇，我話，“有啲字喔”，咁他話，“係嘅，你講出來乜嘢字咯嘛”，我話“咁唔係有啲數字啊，有啲英文咁嘅，英文字母咯嘛”

女：	嗯嗯
莫：	咁咪讀了。“得啦。”
女：	即係睇下你有冇色盲嗟？
莫：	係，睇色盲，睇下你個樣
女：	哦……
莫：	睇下你個樣有冇……即係唔係
女：	合唔合格啦
莫：	合唔合格啲啲嘢？
女：	嗯嗯
莫：	即係……所謂講雞啊啲啲更加唔得咯啦
女：	係係，即所以他都要考試啦，考完試就要面試了？
莫：	面試，個個都面試
女：	咁考唔到就有面試嘅了，其實？
莫：	冇
女：	係唔係啊？喔。即係你面試其實都合格嘅了
莫：	係
女：	哦
莫：	考唔到啲啲就……
女：	就送返去嘅了？
莫：	就送返去嘢
女：	哦哦
莫：	咁他同時呢……他……有道呢——他睇我們之後呢，他以後都記得你
女：	係呀？咁犀利啊？
莫：	好犀利
女：	係嘢
莫：	我們畢業……
女：	嗯
莫：	我們畢業……額……嗰陣時……額……好似喺學校
女：	係

莫：	咁天冷咯嘛，我們行街，咁就碰到他
女：	嗯嗯
莫：	縮啊縮下咁，咁他坐架車行過，咁認得他架車嘅嘛
女：	係係
莫：	個個咪立正敬禮㗎
女：	係
莫：	但係他見到……他起先已經見到我們幾個縮啊縮啊咁，他就去到司令部就叫我們見了
女：	哦
莫：	咁咪我們又唔知道他做乜嘢嘅
女：	嗯
莫：	“頭先點解你們喺馬路度行，咁個款？”
女：	即……哦……好緊要咯？
莫：	係啊
女：	即係企出街嘅儀態都要……規範？
莫：	係啊，即行路……
女：	行路都要規範？
莫：	係，你知咯，冇人咯嘛，咁我們凍咯嘛，咁就縮啊縮啊㗎
女：	哦，係係
莫：	他話，“咁唔得咯㗎。”
女：	嗯哼
莫：	咁又要 say sorry
女：	係
莫：	又要……
女：	即係記得犀利咯㗎？
莫：	好犀利，好記性！
女：	好記性，係
莫：	他也嘢事認過你嗰……係入學嗰陣時見過面咯嘛，他就咁都認得
女：	係係。咁你最後點樣知道自己考到啊？放榜？
莫：	放榜嘅

女：	放榜？喔……放榜，係嘢
莫：	放榜，喺司令部門口見過榜文
女：	係嘢，係嘢
莫：	榜文咯嘛
女：	睇名咯嘛？
莫：	係係，乜名乜名，第一第二……
女：	咁你見到自己考到，冇第幾名嘅係嗎？一堆名字？
莫：	有咯，
女：	係
莫：	一堆名字由頭到尾咯嘛
女：	哦，就六十幾個？
莫：	係，六十幾
女：	喔
莫：	第一個就係嗰個姓羅嘅，第二個我咁嘢
女：	你就係第二個考到嘅又係？
莫：	係
女：	你係第二個考到？喔，你好叻喔咁樣
莫：	哎……
女：	即係全國第二名啊？
莫：	係，全國第二名
女：	哦，咁你好叻喔
莫：	哎，嗰陣時係禁嘢
女：	咁你記得自己考到開唔開心啊？
莫：	梗係開心啦
女：	嗯嗯
莫：	又考到，係第二名，咁我們仲……仲玩添
女：	慶祝係唔係呀？
莫：	仲玩添
女：	啊

莫：	因為我們……細路仔啦，就好憎香港嗰班咯嘛
女：	係係
莫：	嗰個領隊成日照顧他們，唔照顧我們，咁梗係有啲……有啲唔忿氣嘅了
女：	嗯嗯
莫：	咁埋啲……因為嗰個領隊又係東江啲……啲啲叫乜嘢……
女：	東江……
莫：	客家人咯嘛
女：	客家人，哦
莫：	咁東……東江嗰班……嗰幾個……七八個咪係客家人咯嘛
女：	嗯嗯
莫：	咁咪客家人同我們又唔……
女：	係係
莫：	咁所以考咗一早走去睇榜
女：	係嘢係嘢
莫：	我們幾個走去睇榜，睇榜啊……細路仔啊，“哎，返去詐考唔到啊。”
女：	哦
莫：	嘿，係第一第二啦
女：	係係
莫：	啊，第三呢都係一個廣東人來的，第三個就係……係茂名來咯
女：	哦哦
莫：	咁三個都係廣東人嘅了
女：	嗯嗯
莫：	咁有好多個都係廣東人
女：	嗯嗯
莫：	廣東人又叻仔啲啦。咁埋“冇話考到了，你中意咪詐咁得咯啦。”
女：	嗯嗯
莫：	冇話比他們聽
女：	係

莫：	他問你得唔得嘅話，話“唔知啊，我自己都唔得了，費事睇了”咁。
女：	係呀係呀
莫：	咁咪返到去又詐嘛，又詐唔中意，又話乜，又話乜……
女：	嗯哼
莫：	呵，咁他們去睇嘢，睇完返來知道我們考到了
女：	他們好嬲嘢，咁他們考唔考到呢？
莫：	考到
女：	他們都考到？
莫：	即係話睇唔到你嘅名
女：	哦哦
莫：	咁咯嘛
女：	係
莫：	咁咪自己又話考唔到嘢，呵呵
女：	咁咪好開心？
莫：	細路仔……
女：	係呀。咁你們考到之後跟著就點樣受訓啊？
莫：	考到之後呢就即刻集中
女：	集中？
莫：	集中再考試
女：	哇，禁嚴格咯？
莫：	係呀
女：	係
莫：	咁埋返咗之後呢，就……六十八人呢，就三十個人，頭個三十個……
女：	係
莫：	就……分做一班
女：	喔
莫：	三十個之後呢
女：	係
莫：	成績比較差嘅了

女：	係
莫：	咁咪第二批
女：	哦哦哦。咁你嘅第一班？
莫：	我們第一班叫做航海第十一屆
女：	哦哦
莫：	航海十一屆
女：	哇，禁他都好嚴格嘅喔？
莫：	係呀。咁咪下麵個班就航海第十二屆
女：	係嘢係嘢。哦，咁樣。咁分咗班之後呢？
莫：	分咗班之後就……未分班咯，即係分咗成績啦
女：	哦哦
莫：	咁之後就送去……貴州
女：	去貴州？
莫：	送去海軍學校
女：	哦，即係海軍學校當時嘅貴州？
莫：	係貴州桐梓啊
女：	哦，桐梓，嗯嗯，邊個“梓”啊？
莫：	梓……李梓……木字邊加個辛，個個“梓”
女：	哦哦，個個“梓”，係係係。就海軍嘅……
莫：	海軍學校
女：	學校？就係貴州？
莫：	係呀，係貴州，貴州桐梓
女：	哦哦
莫：	咁現在個個叫做桐梓海校，桐梓海軍學校
女：	就係以前個間來嘅？
莫：	係係。
女：	嗯嗯
莫：	咁咪送去學校
女：	嗯嗯

莫：	咁咪有啲軍車嘅
女：	係
莫：	咁軍車呢，嗰陣時要成……兩日咯
女：	哦，但係你嗰時候係咪一定要著軍服咯？
莫：	係呀，一考到咪……
女：	一考到當軍人嘅了？
莫：	就當軍人嘅了
女：	係嘢係嘢
莫：	咁咪去到桐梓呢，又再面一次試
女：	哇，都好犀利，好嚴格哦，嗯嗯
莫：	咁咪正式分咗班了
女：	係。咁你同姓羅嗰個係咪一班啊？
莫：	係
女：	又係一班？
莫：	係一班。咁我們最高嘅了嘛
女：	嗯哼
莫：	咁咪三個月後呢再一面
女：	哦哦
莫：	唔得嘅話就開除了
女：	哇，咁嚴格的？
莫：	係呀
女：	真係選精英哦？
莫：	係，好嚴格
女：	好嚴，嗯哼
莫：	咁咪以後呢……
女：	即係三個月之後呢如果合格就繼續留低了？
莫：	就開始……
女：	正式入學了？
莫：	正式入學嘅了

女：	哦哦哦，嗯哼
莫：	咁咪讀書嗰時候呢就……可以講話一個禮拜一次測驗
女：	哇，嗯哼
莫：	一……一……一個月呢一次……月考
女：	哦……嗯
莫：	六個月就一個學期嘛
女：	係係
莫：	一個學期就一次期考
女：	喔，又測驗，月考，期考？
莫：	期考呢，就司令部呢就派一個高級軍官來監考咯
女：	哦哦
莫：	因為我們嘅校長就係……中將嘛
女：	哦哦
莫：	海軍中將咯嘛
女：	嗯嗯
莫：	咁他期考嘅時候呢，就總司令部派一個高級將官……
女：	將軍來的？
莫：	落來監考
女：	嗯嗯。咁你們學點乜嘢為主啊？
莫：	因為你係……小……小學六年級畢業咯嘛，他基本上都係咁咯
女：	係係
莫：	所以入學嘅時候呢就讀中學了，中一
女：	係
莫：	中一嘅課程
女：	哦哦，係
莫：	中一嘅課程，跟著就……額……高中……初中啦
女：	初中？
莫：	初中課程就高中課程啦
女：	係

莫：	高中課程呢就變咗你係大學嘅了嘛
女：	嗯
莫：	就係專業嘅課程了
女：	哦哦，即係高中之後就專業嘅了？
莫：	專業嘅了。航海啊，額，雖然我們學航海，我們都要學機器咯嘛
女：	係嘢
莫：	嗰個輪機啊，力學啊乜嘢，咁咪解釋幾何嘢，立體幾何啦，三角學嗰啲
女：	全部教嘢，理科嗰啲？
莫：	理科嗰啲
女：	嗰啲實識啦
莫：	係呀
女：	咁你們要幾內啊成個課程受訓？
莫：	成個課程五……六年
女：	六年？哦，哇，咁都好完整嘅了個培訓
莫：	係呀
女：	哦，即係由十四歲，讀到二十歲嘅了哦，係嗎？
莫：	係呀
女：	咁其實他都投放好多資源培訓一個人才㗎？
莫：	係呀
女：	咁你們畢業……當係乜嘢程度畢業？他有冇證書俾你們？
莫：	冇……冇冇。咁你畢業證書咯嘛
女：	咁係喺海軍學校嘅畢業證書？
莫：	係。咁咪後期好似係……唔知幾多年後
女：	嗯
莫：	就……教育部承認係……係學士學位嘛
女：	係，當大學畢業嘢
莫：	當大學畢業咯嘛。咁起先就唔理嘅了，就係專業，海軍專業畢業，你就係軍官嘅了
女：	哦，即畢業就軍官嘅了？
莫：	最低級嘅軍官

女：	哦哦。咁係唔係一定嘅海軍服務嘅了？
莫：	一定要嘅了，你……你都有地方去做啦
女：	係嘢，係嘢，咁你就六年都係桐梓了哦？
莫：	嗯，五年……41、42、43、44、45
女：	係嘢
莫：	45，45 年年中……五年，五年
女：	哦，讀到 45 年年中？
莫：	係
女：	即係投降嘅了，日本？
莫：	勝利了，日本仔投降
女：	嗰時候還係桐梓嘅？
莫：	係
女：	哦哦
莫：	咁我們已經畢業了
女：	係嘢
莫：	即學校放我們畢業
女：	係，學校放畢業
莫：	仲未係軍官
女：	嗯嗯
莫：	咁就勝利後了，咁我們就由貴州搬去重慶
女：	哦，又搬返重慶？
莫：	因為重慶嗰陣時司令部搬咗去南京咯嘛
女：	哦哦
莫：	咁咪空咗出來嘢，我們就先搬去重慶
女：	嗯
莫：	咁我們係重慶走嘅時候呢，就桐梓嗰啲低班嗰啲啊，全部都搬去重慶了
女：	都搬去重慶了？哦哦
莫：	咁咪然後我們係重慶呢就去青島嘢
女：	哦，你們由重慶又去青島了？青島嗰度受訓？

莫：	嗰陣時叫做中央海軍訓練團
女：	哦哦，嗯嗯
莫：	咁喺嗰度呢就實習㗎
女：	哦，實習的
莫：	咁咪跟著上……上艦了，咁就叫做艦訓啦
女：	係係
莫：	咁咪一年後啊……
女：	咁你去重慶留咗幾內啊，你係 45 年中就去……重慶啦
莫：	沒幾內的
女：	哦，沒幾內
莫：	沒幾內
女：	就去青島嘅了哦？
莫：	係呀
女：	即都係 1945 年就去青島嘅了？
莫：	係呀
女：	係艦訓嗰啲了？
莫：	嗯
女：	哦哦，嗯嗯。哇，咁你都……其實，他都俾咗個好完整嘅教育……你們喔？
莫：	係呀，一定的
女：	嗯嗯，咁喺青島幾內啊？
莫：	喺青島……一年了
女：	哦，都有一年，嗯哼嗯哼
莫：	一年
女：	咁嗰時打內戰咯了喔？
莫：	係呀
女：	係㗎係㗎
莫：	但係我們冇……冇參加，咁我們畢業就……係
女：	咁你們 46 年畢業啊？

莫：	47
女：	47 哦哦畢業
莫：	47 年畢業，所以我們嗰陣時係民國三十六年
女：	係係
莫：	所以叫做三十六年班
女：	哦，三十六年班？
莫：	唔叫航海第幾屆了
女：	哦哦
莫：	因個嗰陣時好多人呢你係邊間海軍學校嘅，
女：	哦哦
莫：	又第幾屆入嘅
女：	係係
莫：	咁咪有分咯嘛
女：	係係
莫：	咁依家就改了三十六年班嘞
女：	三十六屆了？
莫：	噃
女：	噃呢
莫：	所以以後嗰啲就幾多年班咁
女：	哦哦，你係三十六年班？係係
莫：	咁咪徐學海就係……三十……
女：	三十八？
莫：	三十八年班
女：	三十八年班，徐生。咁你畢咗業之後他係分派還是點啊？
莫：	畢業就……派你去上艦了
女：	哦，派咗你去邊啊嗰時候？
	咁我……我來講呢，就嗰陣時……因為我們畢業嘅時候，又……又係好……好誇張嘅，我們嘅……學校嗰陣時就英國制，就學嗰啲 gyrocompass，你……即……
女：	即係嗰啲乜嘢？

莫：	旋轉羅盤嘞
女：	旋轉羅盤噃
莫：	旋轉羅盤嘞 gyrocompass，咁我們喺桐梓嗰陣時邊度有 gyrocompass 啊，咁咪係學嗰啲理論，gyrocompass 嗰個嘢咁樣轉
女：	噃
莫：	咁……我們推它，推它使轉嘞
女：	哦
莫：	啊，你好似個車葉，你咁樣轉，我咁推，係咪咁落去啊？
女：	噃
莫：	即係咁推，係咪咁樣轉啊？
女：	噃
莫：	旋轉羅盤就唔係咁了，因為它轉得太快了
女：	哦
莫：	轉得快呢，你咁樣推它呢，它就轉彎嘅了
女：	哦
莫：	你咁樣推呢，它就擲高，咁樣的
女：	哦哦
莫：	嗰個 gyrocompass 咁呢，它嘅理論即係咁嘅
女：	哦哦
莫：	咁我們讀嗰陣時又冇得睇
女：	係
莫：	咁咪抓住……抓住件軍服，咁轉咁轉，咁咪好慘咯嘛
女：	係
莫：	咁咪考試嗰陣時唔識嘞
女：	係
莫：	咁咪背嘞
女：	哦
莫：	死背啊
女：	係

莫：	死背啊，問到嗰個問題就背出來
女：	答案出來？
莫：	咁咪答案啊
女：	哦
莫：	咁樣咯嘛
女：	哦哦
莫：	咁去到……去到青島嘅時候了，就美軍教咯嘛
女：	係
莫：	有器材有曬咯嘛
女：	係係
莫：	咁一睇，我們咪識嘢
女：	哦，就明瞭？
莫：	嗰陣時一睇就明咯嘛
女：	嗯
莫：	嗰陣時創語背書，成本書薄薄嘅，個個都喺度背咯
女：	哦……
莫：	咁你……到睇到實物嗰陣時，更加明嘅了嘛
女：	係呀，係呀
莫：	咁所以喺美軍嗰陣時 gyrocompass 它一個 course 咯嘛
女：	嗯嗯
莫：	一個 course 呢它通常係兩個……唔知兩個月還係兩個禮拜，唔記得了
女：	係呀係呀
莫：	咁考試了
女：	嗯
莫：	我們二十二個人畢業
女：	係係
莫：	二十一個一百分
女：	係，哇，嗯哼
莫：	咁咪一個九十五分

女：	嗯哼
莫：	哇，嗰陣時好多嘅訓練團受訓嗰啲係嗰啲……以前海軍
女：	係
莫：	後來有設立了，就走出去做陸軍
女：	哦哦
莫：	做完陸軍，依家有海軍了，他們返番入來
女：	哦哦
莫：	咁嘅陸軍好容易升級咯嘛
女：	嗯嗯
莫：	咁他……他返入來嗰陣時係上校，咁上校，海軍上校，實際上他唔就識嘅，咁樣的
女：	哦
莫：	咁你走入去訓練團，嗰啲美軍都睇到你係乜嘢材料咯嘛
女：	係係
莫：	咁“哇，呢班後生仔，咁叻咯，咁咪，有啦，俾多啲材料他們了，教多他們一個 cross 了” 咁
女：	哦哦
莫：	咁嗰陣時我們又唔中意咯嘛，依依哦哦又唔敢做，又辭了一兩個月做官，呵呵
女：	哦哦
莫：	嗰個隊長教官就話，“嘿，你們依家都係官嘅了，讀多些咪係你們有好處”，咁先有安慰到我們又繼續讀，呢又係一個笑話
女：	係喔，嗯哼嗯哼。咁終於讀埋嗰個就畢業了？
莫：	畢業了
女：	哦。嗯哼，咁你們畢業有冇啲乜嘢畢業典禮嗰啲嘅？
莫：	有，咪係集合嘅度行禮咁啊
女：	哦哦
莫：	派張證書俾你，咁你……
女：	係係
莫：	即係好似啲普通嗰啲學校咁囉
女：	嗯嗯。咁跟著你就派咗去邊啊？

莫：	跟著呢就……美國就要話俾……送……六隻……驅潛艦，驅逐個個驅，驅潛艦，Submarine Chaser
女：	係係係
莫：	咁他……他話指定一定要呢班……呢班後生接，咁呢班後生接，咁咪輪機冇人咯嘛
女：	哦
莫：	咁咪問我們班，你們邊……嗰陣時初初話六只嘅
女：	嗯
莫：	咁邊……邊六個人中意學輪機嘅？咁我話我報輪機㗎
女：	哦
莫：	咁咪有幾個同學報輪機㗎
女：	嗯嗯
莫：	咁輪機要受訓六個月
女：	係
莫：	咁他美國……啲器材就好
女：	係
莫：	他一個……一個 engine，六個 cyclical
女：	嗯哼
莫：	他將它 cut 咗它，cut 咗一……一半，咁咪鑲塊透明膠落去，
女：	係
莫：	咁他一攞嘅時候呢，嗰……嗰啲” pintle”（點樣”屈”（按：廣東口語，指扭曲），個軸點樣轉，咁咪睇到㗎
	嗯嗯
莫：	咁乜嘢時候會噴火，燒著，排煙，點樣……推個個 pintle（01:51:19）落嚟，嗰條軸點樣轉咁㗎
女：	嗯嗯
莫：	咁咪好簡單咯嘛
女：	哦哦
莫：	我們理論又學㗎了
女：	係

莫：	咁唔係睇圖……咁咪都機械咯，他拆……拆咗部機器，“你們兩個裝返它”
女：	嗯哼
莫：	咁咪整少一樣嘢
女：	係
莫：	咁咪搵來搵去唔得嘅，“咁你搵嘢”，“咁咪搵，你俾個答案”
女：	哦……
莫：	“差邊粒螺絲”，咁他俾你，你裝落去，OK，咁先正……
女：	得，過關？
莫：	咁咪係六個月後了，咁咪接艦
女：	哦哦哦
莫：	咁我就接到第一只
女：	係
莫：	你話好彩又好，唔好彩又好，我接咗第一只就派我落廣東了
女：	哦，去廣東？哦嗯
莫：	咁喺黃埔駐防
女：	黃埔？黃埔軍校嗰度？
莫：	喺黃埔……
女：	哦，黃埔江嗰度？
莫：	黃埔港
女：	哦，黃埔港？
莫：	係，即係喺黃埔軍校嗰度附近嘛
女：	係嘢係嘢，嗯嗯
莫：	咁咪派咗落去
女：	嗯嗯
莫：	咁呢就白色恐怖了。
女：	哦
莫：	白色恐怖你聽過咯啦
女：	即係差唔多 49 了，嗰陣時，係唔係啊？
莫：	差唔多 49，未到 49

女：	未到 49？
莫：	嗯嗯。白色恐怖就因為呢……就有一只艦……
女：	嗯哼
莫：	我們低班有一個同學，他要起義
女：	係
莫：	咁咪嗰陣時他起義咯啦，他就……有一班丁就跟他，但係呢就唔得全隻戰艦
女：	嗯
莫：	咁結果起義唔成，唔成他又跳海
女：	嗯
莫：	想游水走
女：	嗯
莫：	點知呢，嗰啲唔肯起義嗰啲，用……
女：	捉到他？
莫：	用……用槍掃啊
女：	哦
莫：	掃死咗
女：	哦……
莫：	咁咪跟著第二次呢，就重慶艦了
女：	哦
莫：	重慶艦嗰個艦長呢，就係我們讀書嗰陣時嘅主任
女：	係呀？哦……
莫：	咁嗰陣時嘅總司令呢，係陸軍嘅
女：	係
莫：	陸軍情報部嘅
女：	嗯
莫：	他就唔出聲。由於初期呢係陳誠副總統呢，陳誠做，做做下唔做，就俾他做
女：	嗯
莫：	咁他係情報部嘅，咁咪……好似……唔知少將還是中將了

女：	嗯
莫：	咁他著海軍制服了哦
女：	嗯
莫：	因為他係海軍總司令咯嘛，著番啲制服。咁咪跟著呢，帶咗好多啲情報部啲人，又著曬海軍制服
女：	嗯
莫：	咁我們就好唔……中意啦，你係外行，領導內行。咁但係我們唔中意都沒符咯
女：	係係
莫：	咁點知就因為嗰個同學咁樣了，咁咪重慶艦又……又嗰個主任就帶咗我去大連了
女：	嗯
莫：	咁他就惱羞成怒了，就落命令：航海十一屆、十二屆同一部分嘅官兵，都有共協嫌疑咯嘛
女：	嗯
莫：	我依家都有個封……個封信……個封命令嘅
女：	係呀
莫：	共諜啊
女：	係係，間諜嘅諜
莫：	間諜啊，就……冚嗰啲要拉
女：	係係
莫：	咁咪拉啰
女：	哦
莫：	咁所以喺……嗰陣時喺上海啊南京啊啲戰艦喇，我們都有同學咯嘛，冚嗰啲拉曬啰
女：	嗯
莫：	拉曬大概……都有兩三百人咯
女：	嗯
莫：	咁拉咗之後有兩三百人咯嘛，他送去……送返去臺灣，喺馬崗嗰度受訓
女：	嗯
莫：	咁……我又唔知，我一個人喺廣東
女：	哈

莫：	咁個軍……第……廣東係隸屬第四軍區咯嘛
女：	嗯嗯
莫：	第四軍區個軍區司令呢，同我就好啱咯，即係啲老大哥來咯嘛
女：	嗯嗯
莫：	咁他可能收到個命令，“切，都唔係共產黨”
女：	哈哈
莫：	咁咪有理由，咁我都唔知嘅嘅
女：	嗯嗯
莫：	咁我後來有一個同學，低我幾班呢，返廣東
女：	嗯
莫：	我話，“喂，點解他們嘅……上海啲人……”
女：	嗯
莫：	“忽然間乜嘢消息都有嘅，以前大家有通信咯嘛”，“咁你唔知啊，”“我唔知啊”“冚 啖拉曬了
女：	嗯
莫：	咁我話“點解啊？”“你們係共產黨嘛話你”
女：	嗯嗯
莫：	“咁我又有事咯？”
女：	嗯
莫：	他話，“你有事可能司令知道你嗰”。
女：	嗯
莫：	他話，“你諗你啦。”
女：	係係係
莫：	咁跟著我後來聽到消息呢，喺廈門有四個，有四個唔知四個、五個同學
女：	嗯嗯
莫：	低我們一班咯，咁我們個陣時呢海軍學校好興咯，我係第一班畢業
女：	嗯
莫：	咁咪成績好個幾個呢，就出來領咗下一班
女：	嗯嗯

莫：	做隊長
女：	嗯
莫：	咁下一班嗰啲畢業呢，嗰頭幾個又要再做下一班嘅隊長，咁咯嘛
女：	嗯
莫：	咁我們嗰班有四個同學，又喺……四個五個啦，喺海軍學校當隊長，嗰陣時已經搬到廈門了
女：	嗯
莫：	上面已經有咗了
女：	嗯
莫：	搬去廈門咁……咁咪有一日，他們後來話俾我聽嘅，忽然間點名，乜名乜名出來，就有得……有得回頭了
女：	嗯嗯
莫：	所以都有得返來嘅了
女：	嗯嗯
莫：	咁後來啲人話俾我聽呢，撤退臺灣嗰陣時呢，槍斃咗了
女：	嗯
莫：	咁有啲又話唔係槍斃咯，裝咗個麻包袋，去海嗰陣時扔咗下去啊。
女：	嗯
莫：	咁總之就係死咗了
女：	係係
莫：	咁……咁我聽下，我一個人，更加唔掂啦
女：	嗯
莫：	情報部嗰啲人唔理你嘅了
女：	嗯
莫：	他話你係間諜
女：	嗯
莫：	咁就槍斃了
女：	嗯嗯
莫：	咁我……又驚咯喔

女：	係
莫：	驚咯喔，啲啲開始嗰時候 49 年嗟嘛
女：	嗯
莫：	又……廣州就淪陷了
女：	係係
莫：	咁就話要……海軍呢，搬去海南島
女：	嗯嗯
莫：	咁個海南島咪就……就話，你們有家眷嗰啲呢，就要跟埋去海南島嘅就報名
女：	嗯
莫：	唔跟去嗰啲呢就送返去鄉下啦咁，返原籍
女：	嗯
莫：	咁我嗰陣時，我又就借頭借路，我的家人……我梗係唔肯……
女：	走系咪？
莫：	去海南，我要送送……返鄉下
女：	係
莫：	咁咪請假嘅
女：	嗯嗯
莫：	請假我咪乘機啊走咗去香港嘅
女：	係係，咁你就決定去香港了？
莫：	係
女：	咁你點解想著香港唔返番新會嘅，嗰陣時，返鄉下喇？
莫：	我……我返鄉下，咁起碼我都有……有啲錢啦
女：	係呀係呀
莫：	咁咪唔至於冇得食嘛
女：	係係，但係……你……你話去香港咯嘛？咁你香港冇人唔識咯嗰陣時？
莫：	有
女：	有……有啊？
莫：	有啲親戚喺度

女：	哦，有啲親戚喺香港
莫：	我先去澳門
女：	哦哦
莫：	由澳門去香港嘛
女：	哦哦，所以就決定都係去香港了？
莫：	係
女：	哦，咁你就嗰時脫離咗海軍了？
莫：	係，嗰陣時就開始脫離了
女：	係啦係啦
莫：	因為……我走嗰陣時呢，就是因為咁樣脫離咯嘛……
女：	嗰個事件喔？
莫：	係
女：	嗯嗯
莫：	我啲同學就喺……喺馬崗呢，叫做受訓，實際上關你。
女：	係係
莫：	咁咪……他們後來點解冇事呢？就係因為升級了
女：	嗯
莫：	你……那你今年畢業做乜嘢階級
女：	嗯
莫：	咁咪升一級嘅時候，下麵個班又……上來
女：	上來啦？
莫：	上來了
女：	嗯
莫：	咁他升升下到我們個班冇咯嘛
女：	哦哦哦
莫：	咁咪嗰陣時蔣經國係總統，他話，“有乜理由，每年都有一班畢業，點解會斷咗一段嘅”
女：	啊，就知道了
莫：	咁後來啲人就報告，他話，“唔係冇，而係呢班人關咗喺馬崗”。
女：	哦哦

莫：	咁他話，“因什麼事關啊？”咁就話咗俾他聽係咁樣
女：	哦哦
莫：	咁他話，“懷疑嗟，咁如果咁多年他們都有事”，咁咪放返出來。取消了呢個……
女：	即係平反嘅
莫：	平反咗，就放返他們出來
女：	係呀
莫：	咁他們咪升級嘅
女：	係係
莫：	咁我已經走咗了
女：	係嘅係嘅
莫：	咁後來又……又話要平反，要補償咯嘛
女：	哦哦
莫：	咁我米寫信嘅，我話，“喂，我都有份嘅喔。”
女：	係呀
莫：	他們話，“你係逃兵啊，你仲想分。”（笑聲）
女：	哈哈，係呀係呀
莫：	講笑嘅。即叫軍部嘅
女：	係係
莫：	因為民進黨……
女：	係嘅
莫：	刪咗它咯嘛，咁咪變咗冇嘅……
女：	係係，真係一個好長篇嘅故事哦
莫：	係呀
女：	哦，好轉折喔，咁返來香港之後就有搞海軍嘅行了？
莫：	冇啦，我……我我行船……走嘅行……行
女：	係嘅
莫：	去英國參加英國船嘅
女：	嗯嗯
莫：	英國貨船

女：	係呀
莫：	英國貨船呢，因我個人呢又……好多時人家話我……唔……唔……唔好脾氣又得
女：	嗯
莫：	你話我唔好脾氣又得。咁咪行英國船呢，咁啲英國人
女：	嗯
莫：	唔同依家呢個時代咯嘛
女：	嗯嗯
莫：	嗰個時……港英政府嗰個時代，啲英國人……
女：	惡啲咁？
莫：	惡咯嘛。咁我們做……去行英國船嘅話，只能夠做低級嘅
女：	嗯嗯
莫：	咁已經唔係幾順嘅了
女：	嗯嗯
莫：	咁我……我嘅海軍，冇止咯，可以做艦長嘅
女：	係
莫：	做輪機長
女：	嗯嗯
莫：	做機械都得嘛
女：	嗰啲船嗰啲乜你都識曬咯啦
莫：	咁依家你要做個低級，仲要俾你們啲外國人欺負，所以我行咗呢……都唔夠一年
女：	哦哦
莫：	唔做了
女：	係啊
莫：	咁咪又行第二只，行咗……行咗三年度
女：	哦哦
莫：	咁咪有個……英國船長，他話，“喂，你又唔想行船，你……你嘅外做……做乜嘢嗰？我介紹你啦。”咁我就入咗間個海圖公司啊
女：	啊哦哦
莫：	咁咪嘅海圖公司做……做到禁上下了，咁我就出出來做……做船公司咁

女：	係
莫：	咁咪搞下搞下咁咪……
女：	係
莫：	到依家啦
女：	係係
莫：	咁咪……但係你一直由頭到尾呢，吳院長都照顧著我
女：	係嘢，你話一直都有聯絡到係嗎？
莫：	有咯
女：	即係成個……
莫：	咁我話俾她聽，我講咁樣咁樣，她話，“唔緊要啦，咁你咪做第二樣嘢。”
女：	係呀係呀
莫：	她又成日安慰我咯嘛
女：	係呀係呀
莫：	咁我後來移民去美國，咁我同她講，她話，“好啊，你……咪來美國探我嘢。”
女：	嗯嗯
莫：	咁但係一年後，我……我嗰陣時仲做緊嘢咯嘛
女：	嗯哼哼
莫：	做緊船公司咯嘛
女：	嗯
莫：	咁咪……去美國三個月
女：	嗯
莫：	嗯，又要買保險，冇啦，咁我走返番香港
女：	嗯嗯
莫：	咁我就跟著越南嗰個老闆呢
女：	係係
莫：	他又叫我放假咯嘛，放三個月去……去美國
女：	哼哼
莫：	我返來，他又返番又做
女：	嗯嗯

莫：	咁咪……再一年呢，就我個仔嚟加拿大
女：	嗯
莫：	咁咪叫我去加拿大，咁我咪又移民加拿大㗎
女：	啱啱，都好多轉折了喔
莫：	又移民加拿大，咁之後就……到依家了
女：	係，係
莫：	咁咪我話……樣樣都話俾院長聽咯
女：	啊啊
莫：	她話，“加拿大”，我話，“你唔……唔快我……又去……又去美國，完呢又走加拿大啊？” 她話，“加拿大幾好啊，又比美國經濟，又近。”
女：	係係
莫：	“你隨時都一樣來搵我咯嗟。”
女：	係呀係呀係，啱啱
莫：	她都有鬧我
女：	哦，冇哦？
莫：	好好人咯
女：	係啊，好好嘅。咁所以就……額……去咗加拿大之後，全過程你都同院長有聯絡？
莫：	有有
女：	係啦係啦
莫：	一直到她唔嚟度
女：	係啊。你係唔係真係叫她院長嘅？
莫：	叫又叫院長，但係個個都當她係阿媽咯嘛
女：	阿媽，係啦係啦，院長媽媽咯嘛
莫：	係呀。但係我有叫她院長媽媽呢
女：	啊，你叫院長啦，還係？
莫：	叫院長
女：	咁她叫你也嘢？
莫：	她叫我名㗎
女：	莫如光咁？

莫：	係呀
女：	哦哦哦
莫：	咁咪你話李漢魂將軍呢，我就叫他主席
女：	主席？哦，主席，係係
莫：	我見到他我都……
女：	咁你有冇去紐約探過他們啊？
莫：	我有去紐約
女：	哦哦
莫：	但係他們返香港都見
女：	有見過面咁樣？
莫：	係
女：	係呀係呀，都好好嘅
莫：	年年都有見
女：	係係係。咁啊莫生，我今日採訪你嘅內容好豐富哦，我整理咗個錄音稿先，用文字整理咗先，然後呢我就 E-mail 俾你？
莫：	好
女：	你係唔係加拿大都係今次你俾我個個電郵啊？
莫：	係
女：	係咪啊？
莫：	因為就……
女：	咁你一月返去係咪啊？
莫：	係
女：	咁我整理咗先，我諗都可能要一段咯了。咁我就電郵俾你睇呀，你睇咗之後有什麼問題呢，我們電郵再聯絡嘅？
莫：	好啊好
女：	好唔好？
女：	哈，你……下次你會唔會……幾時返來咯？定唔定咯？
莫：	冇定咯
女：	冇定咯哈

莫：	係。因為我一般呢……我多數都係年尾返
女：	年尾返？哦，好啊，冬天。因為嗰邊好凍係嗎？
莫：	我又唔係呢個問題呀，即係……即係你一年了，咁咪返來，以前我就喺香港半年，喺嗰邊半年
女：	哈哈，依家就唔係？
莫：	依家年紀大了
女：	哦，費事飛過來
莫：	老太太又病咗
女：	哦……
莫：	咁她又唔想……
女：	係係係
莫：	咁咪但係年尾先返來，因為她有……要探下咯
女：	哦，屋企人嘅？
莫：	屋企人嘅
女：	哦……
莫：	我返來就有嘅了，我返來就……
女：	探下啲朋友？
莫：	係朋友
女：	你個女嘅度嗎？
莫：	我個女她唔中意嗰邊啊
女：	哦哦，係嘅
莫：	所以她喺這邊嘅
女：	嗯哼，哦
莫：	咁我……我就……我喺呢度有好多學生，就一齊嘅
女：	嗯呢，咁就開心啲，過來食下嘢啊，去旅行咁樣
莫：	係呀
女：	咁我……我諗我先要整理咗稿先，咁如果有啲乜嘢地方我唔清楚、唔明白呢，我電郵再請教你？
莫：	唔，冇禁講啊

女：	唔係，要要要咯，因為求真咯嘛，冇……即個記錄啲資料唔會錯咯嘛。咁我就整理咗先，咁如果你返加拿大呢，有啲你以前海軍嘅……有冇啲海軍嗰照片啊或者其他啲資料呢，你……如果可以呢，你可以 send 啲相俾我，或者電郵
莫：	得，我寄俾你
女：	係啦係啦
莫：	書你有了？
女：	有了有了，關生都俾咗我個啲。
莫：	哦
女：	係啦係啦，書有了，書有了，主要就係，如果我們想盡量……如果依家仲有啲校友呢，做咗個口述訪談先，保留咗個資料先
莫：	不過教養院嘅人啊……我又唔識得幾多
女：	唔緊要，我就諗，如果下次有機會呢，我就去高雄嘅，
莫：	嗯
女：	學你話齋，係高雄嗰個校友就直接系兒教院嘅？
莫：	係呀
女：	嗰個我就可能會去嘅，啊徐生呢，有機會咪嘅，唔機會就算嘅
莫：	係呀
女：	哦哦，唔好打攪他了
莫：	他就唔係好熟，即係你假如係講教養院啲嘢叻，他就唔係很熟
女：	啱啱，好好。高雄嗰個就一定要去了？
莫：	係，高雄嗰個就一定要去
女：	係啦係啦
莫：	咁咪……